

陽明先生道學鈔

先生思田書卷之七

赴任謝恩遂陳膚見疏

奏報田州思恩平復疏

處置平復地方以圖久安疏

田州石刻

邊方缺官薦才贊理疏

議處官吏廩俸

戒諭土目

追捕逋賊

牌行委官林應驄督諭土目

牌委指揮趙璇留勦餘賊

牌行副總兵張祐搜勦餘巢

八寨斷藤峽捷音疏

處置八寨斷藤峽以固久安疏

祭永順寶靖土兵文

犒獎儒士岑伯高

共一十五首

○○○赴任謝 恩遂陳膚見疏

臣於病廢之餘特蒙 恩旨起用授以兩廣軍

旅重寄臣自惟朽才病質深懼不任驅使以誤  
國事具本辭免過蒙 聖旨卿識敏才高忠誠

體國今兩廣多事方藉卿威望撫定地方用紓  
朕南顧之懷姚鏌已致仕了卿宜星夜前去節  
制諸司調度軍馬撫勦賊寇安戢兵民勿再遲  
疑推諉以負朕望還差官鋪馬裏賫文前去敦  
趣赴任行事該部知道欽此欽遵兵部移咨到

臣奉讀感泣莫知攸措伏念世受國恩粉骨  
齏骸亦無能報又况遭逢明聖溫旨勤奉若  
是何能復顧其他已於九月初八日扶病起程  
沿途就醫服藥調理晝夜前進奈秋暑早澀舟  
行甚難至十一月二十日始抵梧州思恩田州  
之事尚未及會同各官查審區處然臣沿途涉  
歷訪諸士夫之論詢諸行旅之口頗有所聞不  
敢不爲陛下一言其畧臣惟岑猛父子固有  
可誅之罪然所以致彼若是者則前此當事諸

人亦宜分受其責。蓋兩廣軍門專爲諸徭獍及諸流賊而設。朝廷付之軍馬錢糧事權亦已不爲不專。且重。若使震其軍威。自足以制服諸蠻。然而因循怠弛。軍政日壞。上無可任之將。下無可用之兵。一有警急。必須倚調土官狼兵。若猛之屬者。而後行事。故此輩得以憑恃兵力。日增其桀驁。今夫父兄之於子弟。苟役使頻勞。亦且不能無倦。況於此輩夷獍之性。歲歲調發。奔走道途。不得顧其家室。其能以無倦且怨乎。及

事之平則又功歸於上而彼無所與兼有不才真有司真因而需索引誘與之爲姦其能以無怒且慢乎既倦且怨又怒以慢始而徵發愆期既而調遣不至上嫉下憤日深月積劫之以勢而威益褻籠之以詐而術愈窮由是諭之而益梗撫之而益疑遂至於有今日加以叛逆之罪而欲征之夫卽其已暴之惡征之誠亦非過然所以致彼若是已非一朝一夕之故且當反思其咎姑務自責自勵修我軍政布我威德撫我人民

使內治外攘而我有餘力則近悅遠懷而彼將  
自服顧不復自反而一意憤怒之夫所可憤怒  
者不過岑猛父子及其黨惡數人而已其下萬  
餘之衆固無罪之人也今岑猛父子及其黨惡  
數人旣云誅戮已足暴揚所遺二酋原非有名  
惡目自可寬宥者也又不勝二酋之憤遂不顧  
萬餘之命竭兩省之財動三省之兵使民男不  
得耕女不得織數千里內騷然塗炭者兩年於  
茲然而二酋之憤至今尚未能雪也徒爾兵連



禍結徵發益多財饋益殫民困益深無罪之民  
死者十已六七山徭海賊乘釁搖動窮迫必死  
之寇旣從而煽誘之貧苦流亡之民又從而遊  
歸之其可憂危何啻十百於二酋者之爲患其  
事已兆而變已形顧猶不此之慮而汲汲於二  
酋則當事者之過計矣今當事者之於是役其  
悴心憔思亦可謂勤且至矣特發於憤激而徂  
爲其難是以勞而未效夫二酋者之阻兵拒險  
亦不過畏罪逃死苟爲自全之計非如四方流

劫之賊攻城堡掠鄉村虜財物殺良民日爲百  
姓之患人人欲得而誅之者今驅困憊之民使  
裹糧荷戈以征不爲民患素無仇怨之虜此人  
心之所以不奮而事之所以難濟也又今狼達  
土漢官兵亦不下數萬與萬餘畏罪逋誅之虜  
相持已三月有餘而未能一決者蓋以我兵發  
機太早而四面防守太密是乃投之無所往而  
示之以必不活益使彼先慮預備并心協力堅  
其必死之志以抗我師就使我師將勇卒奮決

能取勝亦必多殺士衆非全軍之道又况人無  
戰志而徒欲合圍待斃坐收成功此我兵之所  
以雖衆而勢日以懈賊雖寡而志日以合備日  
密而氣日以銳者也夫當事者之意固無非欲  
計出萬全然以用兵而言亦已失之巧遲所謂  
强弩之末不能穿魯縞矣臣愚以爲且宜釋此  
二曾者之罪開其自新之路而彼猶頑梗自如  
然後從而殺之我亦可以無憾苟可曲全則且  
姑務息兵罷餉以休養瘡痍之民以絕覬覦之

姦以弭不測之變。迫於區處既定。德威旣洽。蠻夷悅服。之後。此二酋者。遂能改惡自新。則我亦豈必固求其罪。若其尚不知悛。執而殺之。不過一獄吏之事。何至兵甲之煩哉。或者以爲征之不克。而遽釋之。則紀綱疑於不振。臣竊以爲不然。夫天子於天下之民物。如天覆地載。無不欲愛養而生全之。寧有蕞爾小醜。乃與之爭憤求勝。而謂之振紀綱者。唯後世貪暴諸侯。強凌弱衆。吞寡則必務於求勝。而後已。斯固五霸之

罪人也。昔苗頑不卽工，舜使禹益徂征。三旬苗民逆命，禹乃班師振旅。夫以三聖人者爲之君，師以征一頑苗，謂宜終朝而克捷，顧歷三旬之久，而復至於班師以歸。自今言之，其不振甚矣。然終致有苗之格，而萬世稱聖。古之所謂振紀綱者，固若是耳。臣以匪才，繆膺重命，得總制四省軍務，以從事於偏隅之小醜，非不知乘此機會，可以僥倖成功，苟免於怯懦退避。然此必多調軍兵，多傷士卒，多殺無罪，多費糧餉，又不足

以振揚威武。信服諸夷。僅能取快於二酋之憤。而忘其遺患於兩省之民。但知徼功於目前。而不知投艱於日後。此人臣喜事者之利。非國家之福。生民之庇。臣所不忍也。臣又聞兩廣主計之吏。謂自用兵以來。所費銀兩。已不下數十萬。梧州庫藏所遺。不滿五萬之數矣。所食糧米。已不下數十萬。梧州倉廩所存。不滿一萬之數矣。由是言之。尚可用兵不息。而不思所以善後之圖乎。臣又聞諸兩省士民之言。皆謂流官之

設亦徒有虛名而反受實禍詰其所以皆云思恩未設流官之前土人歲出土兵三千以聽官府之調遣既設流官之後官府歲發民兵數千以防土人之反覆卽此一事利害可知且思恩自設流官以來十八九年之間反者五六起前後征勦曾無休息不知調集軍兵若干費用糧餉若干殺傷良民若干朝廷曾不能得其分寸之益而反爲之憂勞徵發浚良民之膏血而諸無用之地此流官之無益亦斷然可睹矣

但論者皆以爲旣設流官而復去之則有更政  
之嫌恐啓人言而招物議是以寧使一方之民  
久罹塗炭而不敢明爲朝廷一言寧負朝廷  
廷而不敢犯衆議甚哉人臣之不忠也苟利於  
國而庇於民死且爲之矣而何人言物議之足  
計乎臣始至地方雖未能周知備歷然形勢大  
畧亦可概見田州切鄰交趾其間深山絕谷皆  
犴獍之所盤據動以千百必須仍存土官則可  
藉其兵力以爲中土屏蔽若盡殺其人改土爲



流則邊鄙之患我自當之。自撤藩籬非久安之計。後必有悔。思恩田州處置事宜俟事平之日遵照勅旨。公同各官另行議奏。但臣既有所聞見不敢不先爲陛下言。使朝廷之上早有定處。臣等得一意奉行不致往復查議失誤事機。可以速安反側。實地方之幸。臣等之幸。臣不勝受恩感激竭忠願效之至。

○○○奏報田州思恩平復疏

嘉靖七年正月二十七日據廣西田州府目民  
盧蘇陸豹黃笋胡喜邢相盧保羅黃王陳羅寬  
戴慶等連名具狀爲悔罪投降陳情乞恩事投  
稱先因本府土官岑猛與泗城州屢年互相讐  
殺獲罪上司於嘉靖五年六月內致蒙奏請官  
兵征勦臨境岑猛自思原無反叛情由意得招  
撫先自同道士錢一真及親信家人逃躲歸順  
州界蘇等俱各畏避四散逃入山林止有各處

寄住客戶千餘，躲避不及，冒犯官軍，俱蒙殺勦。目民人等，俱不敢抵抗官軍，唯有陸綬不曾遠遯，當被擒斬。其餘希好羅河等，俱蒙官軍陸續搜山殺死。驀於當年九月內，歸順土官岑璋書報岑猛見在該州。前月已將道士錢一真功次假作岑猛解報軍門，爾可作急平定地方來迎。爾王蘇等聽信，遣人節送衣服、檳榔等件。岑璋一一收受，言說岑猛不可輕易見人。官府得知，累我續於十月內，岑猛又差人促令邀同王受。

招復鄉村因見府治空虛乘便入城休息又遣  
迎岑猛岑璋回說爾今地方未定姑候來春我  
當發兵三十餘營送爾王來且替爾防守蘇等  
因此逃命屯聚以候岑猛並無叛心嘉靖六年  
正月有人傳說岑猛於天泉壩內急病身死屍  
骨被岑璋燒燬金銀盡被收獲隨遣人去歸順  
探問又被岑璋殺死蘇等痛悔無由竊思官男  
岑邦彥先已齊村病故今聞岑猛又死無主可  
靠欲出投訴切見四方軍馬充斥聲言務要盡

勦又恐飛蟲附火必損其身又蒙上司陰使王  
受圖殺盧蘇又使盧蘇圖殺王受反覆難信投  
降無路日切苦痛今幸 朝廷寬赦 欽命總

制天星體天行道按臨在此神鬼信服蘇等方  
敢捨命求生率領闔府目民男子大小人等共  
計四萬餘名口盡數投降伏乞憫念生靈草命  
赦死立功以贖前罪哀乞憐憫岑猛原無反叛  
情罪存其一脉俯順夷情辦納糧差實爲萬幸  
等情并據思恩府頭目王受盧蘇黃容盧平韋

文明侶馬黃留黃石陸宗覃鑑潘成等亦連名具狀告同前事投稱本府原繫土官自改立流官開圖立里土俗不便奈緣小人冥頑不諳漢法屢次攘亂不定受等同辭懇乞上司仍立目甲不意反致官府嗔恚近又蒙官兵征勦田州要將受等一概誅滅必要窮追逐捕只得逃匿山林兼以八寨蠻子原以剽掠爲生乘機假受姓名每每攻圖城邑劫虜鄉村虛名受禍受等卽欲挺身投訴見得四方軍馬把截無聞陰使

盧蘇圖殺王受，又使王受圖殺盧蘇，反覆難信。以此連年抱苦控訴無由，且受等頗知利害，豈敢自速滅亡。今幸朝廷寬恩，命總制天星

按臨在此，神鬼信服。受等方敢率領所部目民男女大小人等，共計三萬餘名口，捨命投降。伏乞詳情赦死，以全革命。更望俯順夷情，仍復目甲，使得辦納糧差，實爲萬幸。等因。各投訴到臣。據此，照得先於嘉靖六年七月初七日，爲地方事，節奉勅諭：先該廣西田州地方逆賊岑猛

爲亂已令提督兩廣等官都御史姚鏞等督其  
進勦隨該各官奏稱岑猛父子悉已擒斬巢穴  
蕩平捷音上聞已經降勅獎勵論功行賞續  
該各官復奏惡目盧蘇倡亂復叛王受攻陷思  
恩及節據石金所奏前項地方盧蘇王受結爲  
死黨互相依倚禍孽日深將來不可收拾又叅  
稱先後撫臣舉措失當姚鏞等攘夷無策輕信  
寡謀圖田州已不可得并思恩胥復失之要得  
通行查究追奪兵部議奏以各官先後所論事



宜意見不同且兵連兩廣調遣事于隣境地方  
必得重臣前去總制督同議處方得停當今特  
命爾提督兩廣及江西湖廣等處地方軍務星  
馳前去彼處卽查前項夷情田州因何復叛思  
恩因何失守督同姚鏌等斟酌事勢將各夷叛  
亂未形者可撫則撫反形已露者當勦卽勦一  
應主客官軍從宜調遣主輔將官及三司等官  
悉聽節制公同計議應設土官流官何者經久  
利便并先今撫鎮等官有功有過分別大小輕

重明白奏聞區處事體十分重大者具奏定奪  
朕以爾勲績久著才望素隆特茲簡任爾務以  
體國爲心聞命就道竭忠盡力大展謀猷俾夷  
患殄除地方安靖以紓朕西南之憂仍須深顧  
却慮事出萬全一勞永逸以爲廣人久遠之休  
毋得循例辭避以孤衆望欽此欽遵隨於九月  
內節該兵部咨爲辭免重任乞恩養病事臣  
奏奉聖旨卿識敏才高忠誠體國今兩廣多  
事方藉卿威望撫定地方用紓朕南顧之懷姚

見日言  
一  
鑊已致仕了、卿宜星夜前去、節制諸司、調度軍  
馬、撫勦賊寇、安戢兵民、勿再遲疑推諉、以負朕  
望、還差官鋪馬、裏齎文前去、敦趣赴任、行事該  
部知道、欽此、欽遵、當卽啓行、至十一月二十一日  
抵梧州蒞任、十二月內、續准兵部咨爲地方  
大計、緊急用人事、該禮部右侍郎方獻夫奏、節  
奉聖旨、方獻夫所奏、關繫地方大計、鄭潤朱  
麟與姚鑊事同一體、姚鑊已着致仕、鄭潤等因  
情未寧、暫且留用、今旣這等說、鄭潤取回代

朕自簡用朱麟應否去留着兵部會議并  
堪任更代的推舉相應官兩員來看田州應否  
設都御史在彼住劄還着王守仁議處具奏定  
奪欽此備咨前來知會俱經欽遵外本月初五  
日進至平南縣地方與都御史姚鏌交代二十  
二等日太監鄭潤總兵官朱麟陸續各回梧州  
廣州等處聽候新任總兵太監交代去訖當臣  
公同巡按紀功御史石金右布政林富叅政汪  
必東鄒輓副使祝品林大輅僉事汪濤張邦信

申惠吳天挺叅將李璋沈希儀張經及舊任副  
總兵今閑住都指揮同知張佑并各見在軍前  
用事等官會議得思恩田州之役兵連禍結兩  
省荼毒已踰二年兵力盡於哨守民脂竭於轉  
輸官吏罷於奔走卽今地方已如破壞之舟漂  
泊於顛風巨浪中覆溺之患洶洶在目不待智  
者而知之矣今若必欲窮兵雪憤以收全功未  
論其不克縱復克之亦有十患何者今皇上  
方推至孝以治天下惻怛之仁覆被海宇唯恐

一物不得其所、雖一夫之獄、猶慮有所虧枉、  
親臨斷決、况茲數萬無辜之赤子、而必欲窮搜  
極捕、使之噍類不遺、傷伐天地之和、虧損好生  
之德、其患一也。屯兵十萬、日費千金、自始事以  
來、所費銀米、各已數十餘萬。前歲之冬、二酋復  
亂、至今且餘二年、未嘗與賊交一矢、接一戰、而  
其費已若此。今若復欲進兵、以近計之、亦須數  
月、省約其費、亦須銀米各十餘萬。計今梧州倉  
庫所餘銀、不滿五萬、米不滿一萬矣。兵連不息、

而財匱糧絕其患二也。調集之兵遠近數萬屯  
戍日久人懷歸思兼之水土不服而前歲之疫  
死者一二萬人衆情憂惑自頃以來疾病死者  
不可以數無日無之潰散逃亡追捕斬殺而不  
能禁其未見敵而已。若此今復驅之鋒鏑之下  
必有土崩瓦解之勢其患三也。用兵以來兩省  
之民男不得耕女不得織已餘二年永食之道  
日窮老稚轉乎溝壑今春若復進兵又將廢一  
年之耕百姓饑寒切身羣起而爲盜不逞之徒

因而號召之其禍殆有甚於思田之亂者其愚  
四也論者皆以不誅二酋則無以威服土官是  
殆不然今所賴以誅二酋者乃皆土官之兵而  
在我曾無一旅可恃之卒又不能宣布主上威  
德明示賞罰而徒以市井狙獪之謀相欺相誘  
計窮詐見益爲彼所輕侮每一調發旗牌之官  
十餘往反而彼猶驚然不出反挾此以肆其貪  
求縱其吞噬我方有賴於彼縱之而不敢問彼  
亦知我之不能彼禁也益狂誕而無所忌岑猛



之僭妄亦由此等積漸成之是欲誅一二逃死  
之遺孽而養成十數岑猛其患五也兩廣盜賊  
猖獗之巢穴動以數千百計軍衛有司營堡關  
隘之兵時嘗召募增補然且不敷今復盡取而  
聚之思田之一隅山獠海寇乘間竊發遂至無  
可捍禦近益窺我空虛出掠愈頻爲患愈肆今  
若復聞進兵彼知事未易息遠近相煽蠭起我  
兵勢難中輟救之不能棄之不可其爲慘毒可  
憂尤有甚於饒寒之民其患六也軍旅一動饋

運之夫騎征之馬各以千計每夫一名顧直一  
兩馬一匹四兩馬之死者則又追償其主之直  
是皆取辦於南寧諸屬縣百姓連年兵疲困苦  
已極而復重之以此其不亡而爲盜者則亦溝  
中之瘠矣其患七也兩省土官於岑猛之滅已  
各懷唇齒之疑其各州土目於蘇受之討又皆  
有狐兔之憾是以遲疑觀望莫肯効力所憑恃  
者獨湖兵耳然前歲之疫湖兵死者過半其間  
固多借倩而來兵回之日死者之家例有償命

銀兩總其所費亦以萬數今茲復調踣頓道途  
不得顧其家室亦已三年勞苦怨鬱潛逝而歸  
者相望於道誅之不能止因一隅之小憤而重  
失三省土人之心其間伏憂隱禍殆難盡言其  
患八也田州外捍交趾內屏各郡其間深山絕  
谷又皆猺獞之所盤據若必盡誅其人異時雖  
欲改土設流亦已無民可守非獨自撤藩籬勢  
有不可抑亦藉膏腴之田以資猺獞而爲邊夷  
拓土開疆其患九也旣以兵克必以兵守歲歲

調發勞費無已。秦時勝廣之亂。實興於閭左之  
戍。且一失制馭。變亂隨生。反覆相尋。禍將焉極。  
其患十也。故爲今日之舉。莫善於罷兵而行撫。  
撫之有十善。活數萬無辜之死命。以明昭皇  
上好生之仁。同符虞舜有苗之征。使遠夷荒服。  
無不感恩懷德。培國家元氣。以貽燕翼之謀。  
其善一也。息財省費。得節縮贏餘。以備他虞。百  
姓無椎脂刻髓之苦。其善二也。久戍之兵。得遂  
其思歸之願。而免於疾病死亡。脫鋒鏑之慘。無

土崩瓦解之患其善三也。又得及時耕種不費農作。雖在困窮之際。然皆獲顧其家室。亦各漸有回生之望。不致轉徙自棄而爲盜。其善四也。罷散土官之兵。各歸守其境土。使知朝廷自有神武不殺之威。而無所恃賴於彼。陰消其桀驁之氣。而沮懾其僭妄之心。反側之姦自息。其善五也。遠近之兵。各歸舊守。窮邊沿海。咸得修復。其備禦盜賊。有所憚而不敢肆。城郭鄉村。免於驚擾劫掠。無虛內事。外顧此失彼之患。其善

六也。息饋運之勞。省夫馬之役。貧民解於倒懸。得以稍稍甦復。起呻吟於溝壑之中。其善七也。土民釋兔死狐悲之憾。土官無唇亡齒寒之危。湖兵遂全師早歸之願。莫不安心定志。涵育深仁。而感慕德化。其善八也。思田遺民。得還舊土。招集散亡。復其家室。因其土俗。仍置酋長。彼將各保其境土。而人自爲守。內制徭獍。外防邊夷。中土得以安枕無事。其善九也。土民旣皆誠心悅服。不須復以兵守。省調發之費。歲以數千官。

軍免踣頓道途之苦居民無往來騷屑之患商旅通行農安其業近悅遠來德威覃被其善十也夫進兵行勦之患旣如彼罷兵行撫之善復如此然而當事之人乃猶徃徃利於進兵者其間又有二幸四毀焉下之人幸有數級之獲以要將來之賞上之人幸成一時之捷以蓋前日之愆是謂二幸始謀請兵而終鮮成效則有輕舉妄動之毀頓兵竭餉而得不償失則有浪費財力之毀聚數萬之衆而竟無一戰之克則有

退縮畏避之。毀循土夷之情，而拂士夫之議，則有形迹嫌疑之毀，是謂四毀。二幸蔽於其中，而四毀惕於其外，是以寧犯十患而不顧，棄十善而不爲。夫人臣之事君也，殺其身而苟利於國，滅其族而有裨於上，皆甘心焉，豈以僥倖之私，毀譽之末，而足以撓亂其志者？今日之撫利害，較然事在必行，斷無可疑者矣。於是衆皆以爲然。二十六日，臣至南寧府，乃下令盡撤調集防守之兵數日之內，解散而歸者數萬有餘，湖兵



數千道阻且遠不易卽歸仍使分留南寧賓州  
解甲休養待間而發初廬蘇王受等聞臣奉  
命前來查勘始知朝廷亦無必殺之意皆有  
投生之念日夜懸望唯恐臣至之不速已而聞  
太監總兵等官復皆相繼召還至是又見防  
守之兵盡撤其投生之念益堅乃遣其頭目黃  
富等十餘人於正月初七日先赴軍門訴告願  
得掃境投生唯乞宥免一死臣等諭以朝廷  
之意正恐爾等有所虧枉故特遣大臣前來查

勘開爾等更生之路爾等果能誠心投順決當貸爾之死因復開陳

朝廷威德備寫紙牌使

各持歸省諭盧蘇王受等大意以爲岑猛父子縱無叛逆之謀卽其兇殘酷暴慢上虐下自有可誅之罪今其父子黨與俱已伏其辜爾等原非有名惡目本無大罪至於部下數萬之衆尤爲無辜今因爾等阻兵負險致令數萬無辜之民破家失業父母死亡妻子離散奔逃困苦已將兩年又上煩

朝廷興師命將勞擾三省之

民爾等之罪固已日深但念爾等所以阻兵負  
險者亦無他意不過畏罪逃死苟爲自全之計  
其情亦有可憫方今聖上推至孝之仁以子  
愛黎元唯恐一物不得其所雖一夫之獄尚恐  
或有欺枉親臨斷決何況爾等數萬之命豈  
肯輕意勦殺故今特遣大臣前來查勘爾更  
生之路非獨救此數萬無辜之民亦使爾等得  
以改惡從善捨死投生牌至爾等部下兵夫卽  
可解散各歸復業安生爾等卽時出來殺到決

當宥爾之死。全爾身家。若遲疑觀望。則天討遂行。後悔無及。限爾二十日內。爾若不至。是朝廷必欲開爾生路。而爾必欲自求死路。進兵殺爾。亦可以無憾矣。蘇受等得牌。皆羅拜踴躍歡聲雷動。當卽撤守備。具衣糧。盡率其衆。掃境來歸。本月二十六日。俱至南寧府城下。分屯爲四營。明日蘇受等皆囚首自縛。各與其頭目數百人。赴軍門投見。號哀控訴。各具投狀。告稱前情。乞免一死。願得竭力報効。臣等看得蘇受等所

訴情節亦與臣等前後所聞所訪大略相同其間雖有飾說亦多真情良可哀憫因復照前牌諭所稱諭以 朝廷恩德以爲朝廷旣已赦爾等之死許爾投降寧肯誘爾至此又復殺爾虧失信義爾之一死決當宥爾矣爾可勿復憂疑但爾蘇受二人擁衆負險雖由畏死然此一方爲爾之故騷擾二年有餘至上煩 九重之慮下疲三省之民若不略示責罰亦何以舒泄軍民之憤於是下盧蘇主受於軍門各杖之一百

皆合辭叩首爲之請命乃解其縛諭以今日  
宥爾一死者是朝廷天地好生之仁杖爾一  
百者乃我等人臣執法之義於是衆皆叩首悅  
服臣亦隨至其營撫定餘衆皆莫不感泣歡呼  
皆謂朝廷如此再生之恩我等誓以死報及  
據狀末告乞憐憫岑猛原無反叛情罪存其一  
脉俯順夷情辦納糧差一節自臣奉命而來  
沿途詢諸商賈行旅訪諸士夫軍民莫不以爲  
宜從夷俗仍立土官庶可永久無變不然反覆

之患終恐不免及臣至此又公同大小各官審度事勢屢經酌量議處亦皆以爲治夷之道宜順其情臣於先次謝恩本內已經略具奏聞至是因其控告哀切當卽遵照勅諭便宜事理許以其情奏請且諭以朝廷之意無非欲生全爾等爾等但要誠心向化改惡從善竭忠報國勿慮朝廷不能順爾之情於是又皆感泣歡呼皆謂朝廷如此再生之恩我等誓以死報且乞卽願殺賊立功以贖前罪臣因諭以

好說

朝廷之意唯願生全爾等今爾等方來投生豈  
忍又驅之兵刃之下爾等逃竄日久家業破蕩  
且宜速歸完爾家室及時耕種修復生理至於  
各處賊盜軍門自有區處不須爾等勦除待爾  
家事稍定徐當調發爾等於是又皆感泣歡呼  
皆謂朝廷如此再生之恩我等誓以死報臣

好說

於是遂委右布政林富舊任總兵官張祐分投  
省諭安插其衆俱於二月初八日督令各歸復  
業去訖地方之事幸遂平定皆皇上至孝達



順之德感格上下神武不殺之威震懾鬼神風  
行於廟堂之上而草偃於百蠻之表是以班師  
不待七旬而頑夷卽爾來格不折一矢不戮一  
卒而全活數萬生靈是所謂綏之斯來動之斯  
和者也臣以蹇劣繆當任使仰賴鴻休得免  
罪責快覩盛明豈勝慶幸除將設立土官及地  
方一應經久事宜遵照勅旨公同各官再行  
議處另行具奏外緣繫奏報平復地方事理爲  
此具本專差冠帶舍人王洪親齎謹具題知

〇〇〇處置平復地方以圖久安疏

仁人君子千載生氣

臣聞傳說之告高宗曰明王奉若天道建邦設都樹后王君公承以大夫師長不惟逸豫惟以亂民今天下郡縣之設乃有大小繁簡之別中土邊方之殊流官土襲之不同者豈故爲是多端哉蓋亦因其廣谷大川風土之異氣人生其間剛柔緩急之異稟服食器用好惡習尚之異類是以順其情不違其俗循其故不易其宜要在使人各得其所固亦惟以亂民而已矣臣以

迂庸繆膺重命勘處兵事於茲土節該欽奉

勅諭謂可撫則撫當勦卽勦是陛下之心唯

在於除患安民未嘗有所意必也又節該欽奉

勅諭謂賊平之後公同議處應設土官流官何

者經久利便是陛下之心唯在於安民息亂

未嘗有所意必也始者思田梗化既舉兵而加

誅矣因其悔罪來投遂復宥而釋之固亦莫非

仰體陛下不嗜殺人之心惓惓憂憫赤子之

無辜也然而今之議者或以爲流官之設中土

之制也。已設流官而復去之，則嫌於失中。土之制，土官之設，蠻夷之俗也。已去土官而復設之，則嫌於從蠻夷之俗。二者將不能逃於物議，其何以能建事而底績乎？是皆不然。夫流官設而夷民服，何苦而不設流官乎？夫唯流官一設而夷民因以騷亂，仁人君子亦安忍寧使斯民之騷亂而必於流官之設者？土官去而夷民服，何苦而必土官乎？夫唯土官一去而夷民因以背叛，仁人君子亦安忍寧使斯民之背叛而必於

土官之去者是皆虞目前之毀譽避日後之形迹苟爲周身之慮而不爲國家思久長之圖者也其亦安能仰窺陛下如天之仁固平平蕩蕩無偏無黨惟以亂民爲心乎臣於思恩田州平復之後卽已仰遵聖諭公同總鎮鎮巡副叅三司等官太監張賜御史石金等議應設流官土官何者經久利便不得苟有嫌疑避忌而心有不盡謀有不忠乃皆以爲宜仍土官以順其情分土目以散其黨設流官以制其勢蓋

夷之性譬猶禽獸麋鹿必欲制以中土之郡  
縣而繩之以流官之法是羣麋鹿於堂室之中  
而欲其馴擾帖服終必觸樽俎翻几席狂跳而  
駭擲矣故必放之閒曠之區以順適其獷野之  
性今所以仍土官之舊者是順適其獷野之性  
也然一唯土官之爲而不思有以散其黨與制  
其猖獗是縱麋鹿於田野之中而無有乎牆墉  
之限獷牙童梏之道終必長奔直竄而無以維  
繫之矣今所以分立土目者是牆墉之限獷牙

好

童梏之道也。然分立土目而終無連屬綱維於其間，是畜麋鹿於苑囿而無守視之人，以時修其牆墉，禁其羣觸，終將踰垣遠逝而不知踐禾稼，決藩籬而莫之省矣。今所以特設流官者，是守視苑囿之人也。議既僉同，臣猶以爲土夷之心未必盡得，而窮山僻壤或有隱情也。則亦安能保其必行乎？則又備歷田州思恩之境，按行其村落而經理其城堡，因而以其所以處之之道，詢諸其目長，率皆以爲善。又以詢諸其父老

先○生○之○言○宜○以○是○地○終○矣○

子。第。又。皆。以。爲。善。又。以。詢。諸。其。頑。鈍。無。耻。庸。役。  
下。賤。之。徒。則。又。亦。皆。以。爲。善。然。後。信。其。可。以。久。  
行。而。庶。或。幸。免。於。他。日。之。戮。也。矣。夫。然。後。敢。具。  
本。以。請。亦。恃。聖。明。在。上。洞。見。萬。里。而。無。微。不。  
燭。故。臣。得。以。信。其。愚。忠。不。復。有。所。顧。忌。然。猶。反。  
覆。其。辭。而。更。互。其。說。者。非。敢。有。虞。於。陛。下。不。  
能。亮。臣。之。愚。良。以。今。之。士。人。率。多。執。已。見。而。倡。  
臆。說。亦。足。以。搖。衆。心。而。僨。成。事。故。臣。不。避。煩。古。  
之。騰。者。亦。欲。因。是。以。曉。之。也。煩。瀆。聖。聽。臣。不。



勝戰慄惶懼之至緣繫處置平復地方以圖久  
安長治事理未敢擅便爲此開坐具本請 旨

計開

一特設流官知府以制土官之勢臣等議得  
思田初服 朝廷威德方新今雖仍設土官  
數年之間決知可無反側之慮但十餘年後  
其衆日聚其力日強則其志日廣亦將漸有  
縱肆并兼之患故必特設流官知府以節制  
之其御之之道則雖不治以中土之經界而

納其歲辦租稅之人使之知有所歸効雖不  
蒞以中土之等威而操其襲授調發之權使  
之知有所統攝雖不繩以中土之禮教而制  
其朝會貢獻之期使之知有所尊奉雖不嚴  
以中土之法禁而申其冤抑不平之鳴使之  
知有所赴訴因其歲時伏臘之請慶賀叅謁  
之來而宣其間隔之情通其上下之義矜其  
不能教其不逮寓警戒於溫恤之中消倔强  
於涵濡之內使之日馴月習忽不自知其爲

善良之歸。蓋含洪坦易。以順其俗。而委曲調停。以制其亂。此今日知府之設。所以異於昔日之流官。而爲久安長治之策也。臣等看得田州故地。寬衍平曠。堪以建設流官衙門。但其衝射凶惡。居民弗寧。今擬因其城垣。略加改創修理。備立應設衙門。地僻事簡。官不必備。環府之田二甲。皆以屬之府官。府官旣無民事。案牘之擾。終歲可以專力於農。爲之闢其荒蕪。備其旱潦。通其溝洫。丁力不足。則聽

其募人耕種官給牛具種子歲收其入三分之一以廩官吏而其餘以食佃人城之內外漸置佃人廬舍而歲益增募招徠以充實之田州舊有商課仍許設於河下薄取其稅以資祭祀賓旅柴薪馬夫之給凡流官之所須者一不以及於土夷如此則雖草創之地而三四年後亦可以漸爲富庶之鄉若其經營之始則且須仰給於南寧府庫逮其城郭府治完備事體大定然後總會其土夷之所輸

公田之所入商稅之所積每歲若干而官吏  
之所需者每歲若干斟酌通融立爲經久之  
計又必上司之制用者務從寬假無太苛削  
官吏其土者得以優裕展布無屬促牽制之  
繁此又體悉遠臣綏柔荒服之道也至於思  
恩舊已設有流官但因開圖立里繩以郡縣  
之法是以其民遂亂今宜照舊仍設流官知  
府聽其土目各以土俗自治而其連屬制御  
之道悉如臣等前之所議庶可經久無患

一仍立土官知州以順土夷之情臣等議得  
岑氏世有田州其繫戀之私恩久結於人心  
今岑猛雖誅各夷無賢愚老少莫不悲愴懷  
思願得復立其後故蘇受之變翕然蠡起不  
約而同自官府論之則皆以爲苗頑逆命之  
徒在各夷言之則皆自以爲嬰曰存孤之義  
故自兵興以來遠近軍民徃徃亦有哀憐其  
志而反不直官府之爲者况各夷告稱其先  
世岑伯顏者嘗欽奉 太祖高皇帝勅旨岑

黃二姓五百年忠孝之家禮部好生看他着  
江夏侯護送岑伯顏爲田州府土官知府職  
事傳授子孫代代相繼承襲欽此欽遵其後  
如岑永通岑祥岑紹岑鑑岑鏞岑溥皆嘗著  
征討之績有保障之功猛之暴虐騷縱罪雖  
可戮而往歲姚源之役近年劉召之勦亦皆  
間關奔走勤勞在人各夷告稱官兵未進之  
先猛尚遣人奉表朝賀貢獻又遣人賫本赴  
京控訴官兵將進之時猛遂率衆遠遯未嘗

敢有抗拒以此言之其無反叛之謀踪跡頗明今欲仍設土官以順各夷之情而若非岑氏之後彼亦終有未服故今日土官之立必須岑氏子孫而後可臣等看得田州府城之外西北一隅地形平坦堪以居民議以其地降爲田州而於舊屬四十八甲之內割其八甲以屬之聽以其土俗自治立岑氏之子一人始授以署州事吏目三年之後地方寧靖効有勤勞則授以判官六年之後地方寧靖



効有勤勞則授以爲同知九年之後地方寧靖効有勤勞則授以爲知州使承岑氏之祀而隸之流官知府其制御之道則悉如臣等前之所議如此則朝廷於討猛之罪記猛之勞追錄其先世之忠俯順其下民之望者無得之矣昔文武之政罪人不孥典滅繼絕而天下之民歸心遠近蠻夷見朝廷之所以處岑氏者若此莫不曰猛肆其惡而舉兵加誅法之正也明其非叛而不及其孥仁之

至也錄其先忠而不絕其祀德之厚也不利  
其土而復與其民義之盡也矜其冥頑而曲  
加生全恩之極也卽此一舉而四方之土官  
莫不畏威懷德心悅誠服信義昭布而蠻夷  
自此大定矣此今日知州之設所以異於昔  
日之土官而爲久安長治之策也臣等又看  
得岑猛之子存者二人其長者爲岑邦佐其  
幼者爲岑邦相邦佐自幼出繼武靖州爲知  
州前者徒以誅猛之故有司奏請安置於漳

州然彼實無可革之罪今日田州之立無有  
宜於邦佐者但武靖嘗徃賊之衝而邦佐素  
得其民心其才足能制御邇者武靖之民以  
盜賊昌熾州民無主之故徃徃來告願得復  
還邦佐爲知州以保障地方臣等方欲爲之  
上請如欲更一人諸夷未必肯服莫若仍以  
邦佐歸之武靖而立邦相於田州用其強立  
有能者於折衝捍禦之所而存其幼弱未立  
者於安守宗祀之區庶爲兩得其宜至於思

恩則岑濬之後已絕自不必復有土官之設矣

一分設土官巡檢以散各夷之黨臣等議得土官知州既立若仍以各土目之兵盡屬於知州則其勢并力衆驕恣易生數年之後必有報讐復怨吞弱暴寡之事則土官之患猶如故也且土目既屬於土官而操其生殺予奪之權則彼但唯土官之是從寧復知有流官知府者則流官知府雖欲行其控御節制

之道施其綏懷撫恤之仁亦無因而與各土  
目者相接矣故臣等議以舊屬八甲割以立  
州之外其餘四十甲者每三甲或二甲立以  
爲一巡檢司而屬之流官知府每司立土巡  
檢一員以土目之素爲衆所信服者爲之而  
聽其各以土俗自治其始授以署巡檢司事  
土目三年之後而地方寧靖効有勤勞則授  
以冠帶六年之後而地方寧靖効有勤勞則  
授以爲土巡檢其糧稅之入則徑納於流官

知府而不必轉輸於州之土官以省其費其  
軍馬之出亦徑調於流官知府而不必轉發  
於州之土官以重其勞其官職土地各得以  
傳諸子孫則人人知自愛惜而不敢輕犯法  
其襲授予奪皆必經由於知府則人人知所  
依附而不敢輒携貳勢分難合息朋奸濟虐  
之謀地小易制絕恃衆跋扈之患如此則土  
官既無羽翼爪牙之助而不敢縱肆於爲惡  
土目各有土地人民之保而不敢黨比以爲

亂此今日巡檢之設所以異於昔日之土目而爲久安長治之策也至於思恩事體悉與田州無異亦宜割其目甲分立以爲土巡檢司聽其以土俗自治而屬之流官知府則流官之設既不失朝廷之舊巡司之立又足以散土夷之黨而土俗之治復可以順遠人之情一舉而兩得矣

一田州既改流官亦宜更其府名初岑猛之將變忽有石自田州江心浮出傾卧岬側其

時民間有田石傾田州兵田石平田州寧之  
謠。猛甚惡之。禁人勿言。密起百餘人。夜平其  
石。旦卽復傾。如是者屢屢已。而果有兵變。今  
年二月。盧蘇等旣來投順。歸視其石。則已平  
矣。皆共喜異。傳以爲祥。臣至田州。親視其石。  
聞土人之言如此。民間多取田寧二字。私擬  
其名。臣等欲乞朝廷。遂以此意命之。雖非  
大義所關。亦足以新耳目而定人心之一端  
也。其該府所設官員。臣等擬於知府之外。佐



貳則同知或通判一員、首領則經歷知事各一員、吏胥畧具而已、今見在者已有通判張華、知事林光甫、照磨李世亨、其知府亦已選有一員陳能、然至今尚未到任、臣嘗訪詢其故、咸謂陳能原奉朝旨、陞廣西布政司右叅政、管田州府事、又賜之勅旨、以重其權、吏部奏有欽依、令其先赴該司到任、然後往蒞田州、該司左布政嚴紘謂其既掌府事、卽繫屬官、不得於該司到任、陳能遂竟還原

籍至今亦不復來。參照嚴紘妄自尊大。但知立上司之體勢。而輒敢慢視。勅旨茂廢部移固已深爲可罪。陳能則褊狹使氣。徒欲申一已之小憤。而遂爾委巧朝命於草萊。棄職任如敝屣。使爲人臣者而皆若此。則地方之責焉所寄託而朝廷威令何以復行乎。臣等所訪如此。但未委虛的。乞將二人通行提究。重加懲戒。以警將來。臣觀陳能氣性悻悻。若此亦非可使以綏柔新附之民者。看得廣

東化州知州林寬舊任南康通判翦緝安義諸賊甚得調理且其才識通敏幹辦勤勵臣時巡撫江西深知其有可用近因田州改建府治修復城垣地方無官可任已經行文委令經理其事卽若陞以該府同知而使之久於其職其所建立必有可觀迨其累有成績遂擢以爲知府使終身其地彼亦欣然過望必且樂爲不倦爲益地方決知不少矣大抵田州之亂起於搜剔太甚今其歸附皆出誠

心原非以兵力強取而得者故不必過爲振厲駕抑急其譏防反足生變但與之休養生息略施控御其間可矣夫走狗逐兔而捕罟以狸人之才器各有所宜也

一思恩府設立流官亦宜如田州之數其知府一員吳期英見在但已屢有奔逃之辱難以復臨其下然未有可去之罪且宜改任於他所姑使之自効可矣看得柳州府同知桂鏊督餉賓州思恩之人聞其行事頗知信向

近以修復思恩府治、委之經理、其所謀猷、雖未見有大過於人、然皆平實詳審、不爲浮飾、似於思恩之人爲宜、苟未能灼知超然卓異之才、舉而用之、以一新政化、則得如鑿者、器而使之姑、且修弊補鑠、休勞息困、以與久疲之民相安於無事、當亦能有所濟也、乞勅吏部再加裁酌而改用之、

一田州各甲今擬分設爲九土巡檢司、其思恩各城頭今擬分設爲九土巡檢司、各立土

目之素爲衆所信服者管之其連屬之制陞授之差俱已備有前議但各甲城頭既已分析若無人管理復恐或生弊端臣等遵照勅諭便宜事理已曾行牌仰各頭目暫且各照分掌管辦納兵糧候奏請 命下然後欽遵施行

○一田州凌時甲完冠砦陶甲腮水源坤官位甲舊朔勒甲兼州子半甲共四甲半擬立爲凌時土巡檢司擬以土目龍寄管之緣龍寄

先來投順故分甲比衆獨多

一田州砦馬甲略羅博溫甲共三甲擬立爲砦馬土巡檢司擬以土目盧蘇管之

一田州大日子甲那帶甲錦養甲共三甲擬立爲大田土巡檢司擬以土目黃富管之

一田州萬洞甲周甲共二甲擬立爲萬洞土巡檢司擬以土目陸豹管之

一田州陽院右鄧甲控講水冊槐並畔只共二甲擬立爲陽院土巡檢司擬以土目林盛

管之

一田州思郎那召甲舍甲共二甲擬立爲思郎土巡檢司擬以土目胡喜管之

一田州累彩甲子軒憂甲篤忻下甲共三甲擬立爲累彩土巡檢司擬以土目盧鳳管之

一田州怕何甲速甲共二甲擬爲怕何土巡檢司擬以土目羅玉管之

一田州武龍甲里定甲共二甲擬立爲武龍巡檢司擬以土目黃笋管之



一田州拱甲、白石甲、共二甲、擬立爲拱甲、土  
巡檢司、擬以土目邢相管之

一田州床甲、砦例甲、共二甲、擬立爲床甲、土  
巡檢司、擬以土目盧保管之

一田州焚鳳甲、工堯降甲、共二甲、擬立爲焚  
鳳土巡檢司、擬以土目黃陳管之

一田州下隆甲、周甲、共二甲、擬立爲下隆土  
巡檢司、擬以土目黃對管之

一田州縣甲、環甫蛙可甲、共二甲、擬立爲縣

甲土巡檢司擬以土目羅寬管之

一田州篆甲煉甲共二甲擬立爲篆甲土巡檢司擬以土目黃萊管之

一田州砦桑甲義寧江那半甲共二甲半擬立爲砦桑土巡檢司擬以土目戴德管之

一田州思幼東平夫棒甲盡甲子半甲共二甲半擬立爲思幼土巡檢司擬以土目楊趙管之

一田州侯周怕豐甲一甲擬立爲侯周土巡

檢司擬以土目戴慶管之

○一思恩興隆七城頭兼都陽十城頭擬立爲土巡檢司擬以土目韋貴管之緣韋貴先來向官故授地比衆獨多

一思恩白山七城頭兼丹良十城頭擬立爲白山土巡檢司擬以土目王受管之

一思恩定羅十二城頭擬立爲定羅土巡檢司擬以土目徐五管之

一思恩定安六城頭擬立爲定安土巡檢司

擬以土目潘良管之

一思恩古零通感那學下半四堡四城頭擬立爲古零土巡檢司擬以土目覃益管之

一思恩舊城十一城頭擬立舊城土巡檢司擬以土目黃石管之

一思恩那馬十六城頭擬立爲那馬土巡檢司擬以土目蘇關管之

一思恩下旺一城頭擬立爲下旺土巡檢司擬以土目韋文明管之

一思恩都陽中團一城頭擬立爲都陽土巡檢司擬以土目王留管之

右各目之內唯田州之龍寄思恩之韋貴徐五事體於各目不同而韋貴又與徐五龍寄稍異蓋韋貴於事變之始卽來投順官府又嘗効有勤勞宜不待三年而卽與之以實授土巡檢以旌其功徐五亦隨韋貴投順而効勞不及龍寄雖無功勞而投順在一年之前二人者宜次韋貴不待三年而卽與之冠帶

三年而卽與之以實授土巡檢如此則功罪之大小投順之先後皆有差等而勸懲之道著矣或又以盧蘇王受不當與各土目並立者臣等又以爲不然方其率衆爲亂則蘇受者固所謂罪之魁矣及其率衆來降則蘇受者又所謂功之首也况二府目民又皆素服二人今若立各土目而二人不與非但二人者未能帖然於衆目之下衆目固亦未敢安然而處其上非所以爲定亂息爭之道也故

臣等仍議以盧蘇王受爲衆目之首庶幾事體穩帖而人心允服矣

一田州思恩各官目人等見監家屬男婦初擬解京今各目人等旣已投順則其家屬男婦相應給還領養

一田州新服用夏變夷宜有學校但瘡痍逃竄之餘尚無受廬之民焉有入學之士况齋膳廩餼俱無所出卽欲建學亦爲徒勞然風化之原終不可緩臣等議欲於附近府州縣

學教官之內、令提學官、選委一員、暫領田州學事、聽各學生徒之願、改田州府學、及各處儒生之願、來田州附籍入學者、皆令寄名其間、所委教官、時至其地、相與講肄游息、或於民間、興起孝弟、或倡遠近、舉行鄉約、隨事開引、漸爲之兆、俟休養生息、一二年後、流移盡歸、商旅湊集、民居已覺、旣庶、財力漸有可爲、則如學校、及陰陽醫學之類、典制之所宜備者、皆聽該府官、以次舉行、上請、然後爲之設



官定制如此則施爲有漸而民不知擾似亦招徠填實之道鼓舞作新之機也

一思田去梧州水陸一月之程軍門隔遠難於控馭調度兼之府治雖立而規制未成流官雖設而職守未定且瘡痍未復人心憂惶須得重臣撫理臣等已經具題乞將右布政林富量陞憲職存留舊任副總兵張祐使之更迭往來於二府地方綏緝經理仍乞賜以便宜勅書將南寧賓州等府衛州縣

及東蘭南丹泗城那地都康向武等土官衙門俱聽林富等節制臣等所議地方經久事宜候奏請命下之日悉以委之林富等使之欽遵以次施行

○田州石刻

田石平田州寧

此民謠也

田水縈田山迎

此府治新向也

千萬世輦

皇明戊子春新建伯王守仁勒此石告後人

李卓吾曰先生於此有深慶矣自不覺屢齒之折也

○○○邊方缺官薦才贊理疏

邇者思恩田州之變諸夷感慕聖化悔罪求生已蒙浩蕩之仁宥納而撫全之地方亦既寧定矣但凋弊之餘必須得人以時綏緝况兩府設立流官衙門及修築城池營堡等項百務並舉若無專官夙夜經理催督則事無統紀功難責成已經臣等具題乞將右布政林富等陞職留撫隨蒙將林富陞任去訖又經臣等仍乞推選相應官員替任俱未奉明旨臣看得今歲

例當朝 覲各該掌印官員不久皆將赴京而  
廣西布按二司等官適多還轉去任者右布政  
林富陞鄖陽副都御史叅政黃芳陞江西布政  
副使李如圭陞陝西按察使叅政龍誥叅議汪  
必東僉事吳天挺等督押湖兵出境往復之間  
卽須半年叅議鄒輓僉事申惠皆賫捧表箋進  
京其餘雖有一二新除官員皆未到任止存左  
布政嚴紘按察使錢宏各掌司印僉事張邦信  
巡桂林李傑分巡蒼梧而臣在南寧思田等

處興疾往來調度再無一官隨從贊理者近日  
止有兵備副使翁素來管右江道事緣其才性  
乃慈祥愷悌之人用之中土分理司事足爲循  
良而置之邊方瘴癘多事之鄉則其稟質稍弱  
不耐崎險易生疾病似於風土亦非所宜臣看  
得爲民副使陳槐平生奮志忠節才既有爲而  
又能不避艱險致仕知府朱袞年力壯健才識  
通敏去任副使施儒學明氣充忠信果斷閑任  
副使楊必進曉練軍務識達事機此四人者皆

堪右江兵備之任、施儒舊爲兵備於潮惠、楊必  
進舊爲兵備於府江、皆嘗著有成績、何故、兩地夷民  
去任也、至今思念不忘、若於四人之中、選用其一、其於  
地方之事、必有所濟、及照田州新附之地、知府  
陳能尚未到任、該臣看得化州知州林寬、舊在  
江西、知其才能足克任使、已經具奏行委、見在  
該府管事、但其稟質、乃亦不禁炎瘴、於風土非  
宜、蒞事以來、終月卧病、呻吟牀席、軀命且不能  
保、又何能經理地方之事乎、臣又訪得潮州府

官李喬木者才力足以有爲而又熟知土俗  
夷情服於水土但繫梧州籍貫稍有鄉里之嫌  
臣看得廣西軍衛有司衙門所屬官員及各學  
教職亦皆多用本省士人今田州雖設流官知  
府而其所屬乃皆土夷自無鄉里之嫌可避亦  
與各教職無異者乞 勅吏部改用林寬於別  
地俯採臣議將李喬木改陞田州同知庶可使  
之久於其任以責成功則地方之幸臣之幸也  
臣唯任賢圖治得人實難其在邊夷絕域反覆

多事之地則其難尤甚何者反覆邊夷之地非得忠實勇果通達坦易之才固未易以定其亂有其才矣使不諳其土俗而悉其情性或過剛使氣率意徑行則亦未易以得其心得其心矣使不耐其水土而多生疾病亦不能以久居於其地以收積累之効而成可底之績故用人於邊方必兼是三者而後可卽如右江一兵備此臣之所最切心者臣竊爲吏部私計其人終夜不寢而思之竟未見有快心如意者蓋兼是三



者而求之也。如前所舉四人者，固皆可用之才。○謹○要○先○生○勞○今乃皆爲時例所拘，棄置不用，而更勞心遠索，則亦過矣。臣近於南寧、思田諸處，因無可用之才，調取其發身科第以遷謫而至者三四人，其志向才識，果自不羣，足可任用。但到未旬日，而輒以患病告歸，皆相繼狼狽扶攜而去矣。不得已就其見在者而使之，則皆庸劣陋下，素不可齒於士類者。然無可奈何，則畧其全體之惡，而用其一肢之能，旣其終事所就不能以尺寸而

破。壞。則。尋。丈。矣。用。是。觀。之。亦。何。怪。乎。斯。土。之。民。  
愈。困。亂。愈。積。而。禍。日。以。深。也。哉。是。固。相。沿。積。習。  
之。弊。不。及。今。一。洗。而。改。革。之。邇。患。未。見。其。能。有。  
瘳。也。夫。今。之。以。朝。覲。考。察。而。去。固。多。貪。暴。不。才。  
之。人。矣。其。間。乃。有。雖。無。過。人。之。才。而。亦。無。顯。著。  
之。惡。尚。在。可。用。不。可。用。之。間。者。皆。未。暇。論。至。其。  
平。生。磊。落。自。負。卓。然。思。有。所。建。立。而。其。學。識。才。  
能。果。足。以。有。爲。者。乃。爲。一。時。愛。憎。毀。譽。之。所。亂。  
亦。遂。忤。然。就。抑。而。去。斯。固。天。下。之。所。共。爲。不。平。

公論彌彰者孰得而終掩之。陛下何不使在  
位大臣一時各舉十餘人之可用者。陛下合  
而考之。若一人舉之而九人不舉。未可也。三人  
舉之而七人不舉。已在所察矣。五人舉之而五  
人不舉。其察又宜詳矣。或七人八人舉之。而一  
二人不舉。則其人之可用亦斷在不疑者矣。若  
此者。亦在朝覲二次三次之後。或七年或十年  
而後一舉。夫身退十年之後。則是非已明。公論  
已定。雖有黨比。自不能容。今邊方絕域。無可用

之人至取其庸劣陋下者而使之以滋益地方  
之苦弊其豪傑可用之才乃爲時例所拘棄置  
而不用夫所謂時例者固朝廷爲之也可治  
而拘不可拘而不拘無不可者陛下何忍一  
方之禍患日深月積乃惜破例而用一人以救  
之乎夫考察而去者果皆貪惡庸陋之徒則固  
管營苟苟無時而不僥倖以求進若其磊落自  
負有過人之見者則雖屈抑而退自放於山水  
田野之間亦足以自樂今若用之於邊夷困弊

之地殆亦未必其所欲。但爲朝廷愛惜人才。則當此宵旰側席遑遑求賢之日。而使有用之才廢棄終身。乃不得已至取其庸劣陋下者。而用之以益民困。豈不大可惜乎。臣因地方缺人心切其事。不覺其言之煩瀆。伏望陛下恕其愚妄。下臣議於吏部採擇而去取之。臣不勝瀆冒恐懼之至。

○○議處官吏廩俸

照得近來所屬各州縣衛所倉場等衙門大小官吏以贓問革者相望而冒犯接踵究詢其由皆云家口衆多日給不足俸資所限本已微薄而近例減削又復日甚加有上下接應之費出入供送之繁窮窘困迫計出無聊中間亦有甘貧食苦刻勵自守者徃徃狼狽縊縵至於任滿職革債負纏結不得去歸其鄉夫貪墨不才法律誠所難貸而其情亦可矜憫夫忠信重祿所

以勸士在昔任人既富方穀庶民在官祿足代  
耕此古今之通義也 朝廷賦祿百司厚薄既  
有等級要皆使得裕其資養免其內顧然後可  
望以盡心職業責以廉耻節義今定制所限既  
不可得而擅增至於例所應得又從而裁削之  
使之仰事俯育且不能遂是間之於必貪之地  
而責之以必廉之守中人之資將有不能而况  
其下者之衆乎所據前項事理非獨人情有所  
未堪其於政體亦有所損合行會議查處參酌

事理輕重及查在外官員自二品至九品并雜  
職吏胥等俸米除本色外其折色原例每石作  
銀若干於何年月裁減作銀若干應否復舊或  
量行加增務要議處停當呈來定奪施行



○○戒諭土目

案照先經行委副總兵張祐督率官土目兵人等進勦思恩八寨徭賊今據頭目盧蘇王受等稟報皆已攻破各寨斬獲賊級雖未日久苦亦無多且又未見獲有真正首惡中間恐有容隱脫放情弊合行戒諭督促爲此牌仰本官上緊親行督諭各頭目及土兵人等俱要協力齊心竭忠報効務圖勦滅以絕禍根庶可以表明各目盡忠圖報之真心若是少有縱容復留遺孽

亦是徒勞一場不足爲功適足爲罪非惟不能  
仰報朝廷再生之恩其於本院所以勤勤懇  
懇不顧利害是非務要委曲成就爾等之意亦  
辜負矣牌至卽以此意勉諭各目各兵此舉非  
獨爲除地方之害亦爲爾等建子孫久長之業  
盡此一畚辛苦便可一勞永逸矣發去良民旗  
榜可給則給可止則止一應事機俱仰相機而  
行其號色等項已付思田報効人役徑自帶回  
分俵亦宜知悉

○追捕逋賊

據同知桂鏊稟報領兵土目盧蘇王受等各已  
屯兵八寨斬獲賊首賊從數多巢穴悉已破蕩  
卽今方在分兵四路搜勦及稱附近上林縣一  
十八村俱搬移上山躲住又訪得鐵坑那埋二  
堡賊村界連遷江洛春高徑大潘思盧北三向  
北夷獐村分今皆逃往潛住又訪得八寨賊徒  
我兵未進之前陸續出劫鄉村今皆不敢回巢  
散入賓州淥里并貴縣涼傘壘紙等夷獐村分

藏躲合行分兵搜捕等因看得八寨狂賊稔惡多年攻劫鄉村殺害人民虜掠財畜百姓怨恨痛入骨髓今惡貫滿盈民怨神怒巢穴破蕩分崩離析如失林之梟投且之兔迷魄喪魂正可蒐獵而盡是乃上天欲亡此賊之秋若不乘此機會奉行天討以雪百姓之冤以舒人神之怒以除地方之禍存其遺孽復爲他日根芽此豈爲民父母之心乎及訪得平日哨守八寨官兵人等往往與賊交通者據法俱應明正典刑

今且姑未挈究容其殺賊報效立功自贖除各  
差官督勦外爲此牌仰指揮程萬全督率遷江  
所土官指揮黃祿千戶黃瑞百戶凌顯等各起  
集管下土兵人等前去北三思盧等處搜捕各  
賊仍行曉諭各良善向化村寨務將逃躲各賊  
盡數擒斬以泄軍民之憤獲功解報一體給賞  
若是與賊通謀容留隱蔽訪究得出國憲難  
逃如是各賊果有誠心悔罪願來投撫立功報  
效者亦准免其一死帶來軍門撫諭安插各官

務要盡忠竭力上報國恩下除民患副軍門之委託立自己之功名仍督平日與賊交通之人令其向道追捕痛加懲改及此機會立功自贖果能奮不顧身多獲真正惡賊非但免其既牲之罪抑且同受維新之賞若猶疑貳觀望意圖苟免定行斬首示衆斷不虛言本院數日之後亦且親臨地方躬行賞罰仰各上緊立功毋自取悔

○○○牌行委官林應聰督諭土目

看得田州思恩領兵頭目盧蘇王受等所領  
兵皆繫驍勇慣戰之人今又各爲身家子孫之  
計自願出力報效立功贖罪既已攻破賊巢分  
屯其地則其搜捕潰散之賊當如探囊取物數  
日可盡今已半月有餘尚未見有成功氣勢日  
見委靡此必軍中收有賊巢婦女等項貪戀女  
色財物不肯割捨脫離奮勇殺賊苟且偷安遂  
致兵氣日衰軍威不振若諸賊聞此消息乘此

懈怠掩襲不備我軍必致撓敗如此則是各目  
此舉本欲立功而反敗事本欲贖罪而反增罪  
非惟不能仰報朝廷之德抑且有損軍門之  
威矣正名定罪後悔何及爲此牌仰原任戶部  
郎中今降徐聞縣縣丞林應驄齋執令旗令  
牌會同總兵監軍等官公同署田州府事知州  
林寬身督領兵頭目盧蘇等閱視各營但有收  
得賊巢婦女財物者通行搜出俱各開紀名數  
別立老營一所選委老成頭目另撥謹實小心



兵夫晝夜管守將各貪戀女色財物不肯奮勇  
殺賊頭目兵夫姑且免其罰治責令卽出搜山  
果能多有擒斬旬日之內功成班師仍將前項  
婦女財物照名給還亦不追究前罪若有貪戀  
女賊違犯軍令仍前不肯効力者仰卽遵照軍  
門號令當時斬首示衆斷毋姑息容忍致敗三  
軍大事蓋前日之招撫專以慈愛惻怛爲念者  
乃是本院憐憫兩府之民無罪而就死地乃是  
父母愛子之心惟恐一民不遂其生也至於今

日用兵却須號令嚴明有功必賞有罪必戮者  
乃是本院欲安兩府之民使之立功贖罪以定  
其身家而因以除去地方之患是乃帥師行軍  
之道不如此不足以取勝而成功也差去旗牌  
官員務要星火催督毋事姑息若旬日之後再  
無成功本院親臨分地定先將監軍督軍等官  
明正軍法其推奸避事不肯奮勇殺賊頭目通  
行斬首決不虛言

○○○牌委指揮趙璇留勦餘賊

牌仰指揮趙璇前去督哨副總兵張祐處查審各寨稔惡獠賊曾否勦絕各兵見住何處聞已出屯三里仰就各營土兵目夫凡有疾病老弱者俱令在營將息調理其精壯驍勇目兵仍仰本官務要三四日或五六日督令入山巡勦一番出意外之奇以示不測之武須候各山果無潛遁之妖各巢已無復歸之賊俟軍門牌至方許回兵仍諭土目盧蘇王受等以如此炎毒天

氣如此暑雨連綿各兵久在山中辛勤勞苦本院非不惓惓憂念但一則欲爲爾等立功一則欲爲地方除害心雖不忍久勞爾等而勢有所不能已也爾等其務體本院之意再耐旬日之苦以成百年之功毋得欲速一時致貽後悔事完之日通至賓州本院親行犒賞就領牌劄仰各知悉

○○○八寨斷藤峽捷音疏

據湖廣按察司分巡上湖南道監軍僉事汪濤  
廣西按察司分巡左江道監軍僉事吳天挺分  
巡右江道監軍副使翁素等會呈節據廣西領  
哨潯州衛指揮馬文瑞王勛唐宏卞琚張縉千  
戶劉宗本永順統兵宣慰彭明輔官男彭宗舜  
保靖統兵宣慰彭九霄及辰州等衛部押指揮  
彭飛張恩等各呈前事職等遵奉統領各該軍  
兵依期於本年四月初二日密到龍村埠登岸

當蒙統督叅將張經都指揮謝珮督同宣慰彭明輔分布官男彭宗舜頭目彭明弼彭杰領土兵一千六百名隨同領哨指揮馬文瑞頭目向永壽嚴謹領土兵一千二百名隨同領哨指揮王勲又督同宣慰彭九霄等分布官男彭蓋臣下報効頭目彭志明領土兵六百名隨同領哨指揮唐宏頭目彭九臯領土兵六百名隨同領哨指揮卞琚頭目彭輔領土兵六百名隨同領哨指揮張縉頭目賈英領土兵六百名隨同領

哨千戶劉宗本

各哨官員領潯州等衛所及

武靖州漢土官兵鄉導人等共一千餘名永順  
進勦牛場保靖進勦六寺等賊巢刻定初三日  
寅時一齊抵巢各賊先防湖兵經過各將家屬  
生畜驅入巢後大山潛伏賊首胡緣二等各率  
徒黨團結防拒然訪知本院住扎南寧寂無征  
勦消息又不見調兵集糧而湖兵之歸又皆偃  
旗息鼓畧無警備遂皆怠弛不以爲意至是突  
遇官兵四面攻圍各賊倉惶失措然猶恃其驍

悍蜂擁來敵。當有彭明輔、彭九霄、彭宗舜并頭目田大有、彭輔等督率目兵奮不顧身，衝冒矢石，敵殺數合，賊鋒摧敗。當陣生擒斬獲首賊，并次從賊徒賊級六十九名，顆俘獲男婦及奪回被虜人口、牛隻器械等項數多。餘賊退敗，復據仙女大山，憑險結寨。各兵追圍攀木緣崖，設策仰攻。至初四日，復破賊寨。當陣生擒斬獲首賊并次從賊徒賊級六十二名，顆初五日復攻破油磗石壁大陂等巢，生擒斬獲首賊及次從賊。



徒賊級七十九名、顙俘獲男婦牛隻器械等項、數多、餘賊奔至斷藤峽、橫石江邊、因追兵緊急、爭渡覆溺死者、約有六百餘、徒官兵復從後奮勇追殺、當陣生擒獲斬首賊、及次從賊、徒賊級六十五名、顙俘獲男婦牛畜器械等項、數多、各賊間有一二漏網、亦皆奔竄他境、官兵追殺、至於本月初十日、遍搜山峒、無遺、稟蒙收兵、回至潯州府、任劄間、隨蒙本院、密切牌諭、復令職等移兵進勦仙臺等賊、就於本月十一日、寅夜、仍

前分布各哨官兵遵照牌內方略永順於盤石  
大黃江登岨進勦仙臺花相等處保靖於烏江  
口丹竹埠登岨進勦白竹古陶羅鳳等處刻定  
於十三日寅時一齊抵巢各賊聞知牛腸等巢  
破滅方懷疑懼謀欲據險自固賊首黃公豹廖  
八田等各率徒黨沿途設伏埋簫合勢出拒官  
兵驟進翕如風雨各賊雖已奪氣然猶舍死衝  
敵比之牛腸等賊兇惡尤甚各該官兵奮勇夾  
擊爭先陷陣生擒斬獲首賊及次從賊徒賊級

四百九十名。顆俘獲賊屬男婦牛畜器械等項數多。各賊奔入永安邊界地名立山。特險結寨。當蒙謫調指揮王良輔。并目兵彭愷等於本月二十四日亦各分路並進。奮勇爭先。四面仰攻。賊乃敗散。當陣生擒斬獲首賊及次從賊徒賊級一百七十二名。顆俘獲男婦牛畜器械數多。餘賊遠竄。追殺無遺。又據把截邀擊叅將沈希儀解報擒斬首從賊徒賊級八十六名。顆把截頭目鄧宗七。撫徭老人陳嘉猷。旗軍洪狗驢等。

及貴縣典史蘇桂芳把隘指揮孫龍官舍單錫  
潯州府捕盜通判徐俊平南知縣劉喬等亦各  
呈解擒斬首從賊徒賊級八十一名願俘獲男  
婦器械等項數多又該督兵右布政林富舊任  
副總兵張祐等遵奉本院方略分督田州府報  
效頭目盧蘇等目兵及官軍人等三千名思恩  
府報效頭目王受等目兵及官軍人等二千名  
韋貴等目兵及官軍鄉民人等一千一百名照  
依分定哨道進勦入寨稔惡狂賊刻期於本年

四月二十三日卯時一齊抵巢先於三十二日晚於新墟地方集各土目人等申布本院密授方略乘夜衝枚速進所過村寨寂然不知有兵黎明各抵賊寨遂突破石門天險我兵盡入賊方驚覺皆以爲兵從天降震駭潰竄莫知所爲我兵乘勝追斬各賊且奔且戰薄午四遠各寨驍賊聚衆二千餘徒各執長鏢毒弩并勢呼擁來拒極其猛悍我兵鼓噪奮擊而前聲震巖谷無不一當十賊旣失險奪氣而我兵愈戰益憤

賊不能支遂大奔潰當陣生擒斬獲首賊及次從賊徒賊級二百九十名顆俘獲男婦畜產器械數多賊皆分陣聚黨奔入極高大山據險立寨我兵亦分道追躡圍勦然巖壁峻絕我兵自下仰攻戰勢不便賊從巔嵯發石滾木多爲所傷於是多方設策夜發精銳掩其不備二十四日我兵復攻破古蓬等寨生擒斬獲首賊及次從賊徒賊級共一百三名顆俘獲數多二十八日復攻破周安等寨生擒斬獲首賊及次從賊

徒賊級共一百四十六名。顓俘獲數多。五月初一日復攻破古鉢等寨。生擒斬獲首從賊徒賊級一百二十七名。顓俘獲數多。初十日復攻破都者峒等寨。斬獲首從賊徒賊級一百四名。顓俘獲數多。本月十二等日復據叅將沈希儀解到督領指揮孫繼武等官軍及遷江土目兵夫。人等。於高徑洛春大潘等處追勦。邀擊各寨。奔賊斬獲首從賊徒賊級九十八名。顓都指揮高松解到督領指揮程萬全等官軍及土目兵夫。

人等、於思盧北山等處、搜勦、截捕、各寨、奔賊、斬獲首從賊徒、賊級九十一名、顆。又據同知桂鏊、監督思恩土目韋貴、徐五等、目兵、分勦銅盆等寨、斬獲首從賊徒、賊級一百九十二名、顆、俘獲數多。又據通判陳志敬、督領武緣、應虛等處鄉兵、搜勦大鳴等山、奔賊、斬獲首從賊徒、賊級八十六名、顆。又於本月十七等日、盧蘇王受等、復攻破黃田等寨、斬獲首從賊徒、賊級三百六十二名、顆、俘獲數多。六月初七等日、復攻破鉄坑等



寨斬獲首從賊徒賊級二百五十三名。顥俘獲  
數多。又據指揮康壽松、干鬻王俊等督領官兵  
於綠茅等處把隘搜截。斬獲首從賊徒賊級四  
十八名。顥各賊始雖敗潰。然猶或散或合。至是  
見其渠魁驍悍。悉就擒斬。遂各深逃遠竄。其稍  
有強力者。尚一千餘徒。將奔往柳慶諸處。賊巢  
我兵四路夾追。及之於橫水江。各賊皆已入舟。  
離岸兵不能及。然賊衆船小。皆層疊而載。舟不  
可運。復因爭渡。自相格鬪。適遇颶風大作。各船

盡覆浮泊登岸得不死者僅二十餘徒而已我  
兵旣無舟渡又風雨益甚遂各歸營旣晴我兵  
仍分路入山搜勦各賊茫無踪跡又復深入見  
厓谷之間顛墮而死者不可勝計臭惡薰蒸不  
可復前遠近巖峒之中林木之下堆疊死者男  
婦老少大約且四千有餘蓋各賊且倉卒奔逃  
不曾賫有禾米大雨之中饑餓經旬而旣晴之  
後烈日焚炙瘴毒蒸熾又且半月有餘故皆糜  
爛而死八寨之賊畧已殤盡雖有脫漏亦不能

滿數十餘徒矣。本院議於八寨之中，據其要害，移設衛所以控制諸蠻。復於三里設縣以迭相引帶。親臨相視，思恩府基景定衛縣規則。其時暑毒日甚，山溪水漲，皆惡流臭穢，飲者皆成疫癘。本院因見各賊既已掃蕩，而我兵又多疾疫死亡，乃遂班師而出。照得各職於本年三月二十三等日，先奉本院鈞牌，據左江道守巡守備等官呈稱：斷藤峽等處猺賊上連八寨，下通仙臺花相等峒。累年攻劫郡縣鄉村被害，軍民累

奏請兵誅勦乞要乘此兵威勦滅等因行仰各  
職監統各該官兵進勦各賊諭令未至信地三  
日之前停軍中途候約叅將張經與同守廵各  
官集議先將進兵道路之險夷遠近各巢賊徒  
之多寡強弱及所過良民村分之經由往復面  
同各鄉導人等逐一備細講究明白務要彼此  
習熟若出一人然後刻定日時偃旗息鼓寂若  
無人密至信地乘夜速發務使迅雷不及掩耳  
將各稔惡賊魁盡數擒勦以除民害以靖地方

除臨陣斬獲外其餘脇從老弱一切皆可宥免  
今茲之舉唯以定亂安民爲事不以多獲首級  
爲功各官務仰體朝廷憂憫困窮之心俯念  
地方久罹荼毒之苦仍要禁約軍兵人等所過  
良民村分毋得侵擾一草一木有犯令者當依  
軍法斬首示衆各官既有地方責任兼復素懷  
忠義當茲委任務竭心力以祛患安民事完之  
日通將獲過功次開報紀功御史紀驗以憑奏  
報奉此各職會同叅議汪必東僉事汪濤吳天

挺叅將張經都指揮謝珮遵照軍門成筭分布  
各哨官兵申明紀律嚴督依期進勦前項各賊  
巢穴獲功解報間隨准叅將張經手本密奉本  
院鈞牌仰候牛腸事畢卽便移兵進勦古陶諸  
賊就使各賊先已聞風迯避亦須整兵深入掃  
其巢穴以宣聲罪致討之威若其遂能悔罪効  
順亦宜姑與招安如其仍前憑險縱恣兩征不  
已至於三三征不已至於四務在殄滅以絕禍  
根各官就彼分定哨道永順進勦仙臺諸處保

靖進勦白竹諸處各分鄉導人等引路進兵務  
在計慮周悉相機而行各毋偏執已見致有誤  
事彼中事勢叅將張經久於其地必能知悉仍  
要本官勇當力任斷決而行不得含糊兩可終  
難辭責又經遵照方略依期進勦獲功解報間  
又於四月初五等日各職先奉本院密切鈞牌  
據右布政林富副總兵張祐等呈稱八寨猺賊  
毒害萬民千百里內塗炭已極乞要乘此軍威  
急除一方大患等因本院看得八寨之賊旣極

驍猛而石門天險自來兵不能入此可以計取  
未易以兵力圖者邇者思田旣附湖兵尚留彼  
賊心懷疑懼必已設有備禦今各州狼兵悉已  
罷散而思田新附之民方各歸事農耕湖兵又  
已撤回彼必以我爲無復有意於彼是以近日  
稍稍復出剽掠是殆以此探望官府舉動今我  
若罔聞知且聽其出沒彼亦放縱懈弛謂我不  
復能爲此正夫亡之時機不可失前者思田各  
目感激朝廷再生之恩求欲立功報効當時



許其休息三月然後調用今已及期仰地方政  
林富副總兵張祐照牌事理即便分投察安起  
調各目兵夫趨路前到南寧面聽約束行事各  
職遵奉起調行至新墟地方又密奉進兵方略  
刻定日期當卽遵奉連夜分哨速進遂克攻破  
巢穴連戰皆捷斬獲功次解報間職等各蒙巡  
按廣西監察御史石金案驗爲紀獲功次事案  
行該道各不妨監督如遇叅將張經舊任副總  
兵張祐等官各解到擒斬賊人賊級并俘獲賊

屬男婦牛馬俱要就彼審驗真的事完通查獲  
功員役分別首從功次多寡緣由造冊賁報以  
憑覆審奏報等因除遵奉外今據進勦斷藤峽  
各哨土目官兵解到生擒斬獲首從賊徒賊級  
一千一百四名顆俘獲賊屬五百六十八名口  
進勦八寨各哨土目官兵解到生擒斬獲首從  
賊徒賊級一千九百一名顆俘獲賊屬五百八  
十七名口兩處共計擒斬獲三千五名顆俘獲  
賊屬一千一百五十五名口除遵照案驗事理

再行驗實造冊另報外其各哨解到生擒斬獲  
俘獲等項功次數目合先開報職等會同叅照  
斷藤峽諸賊連絡數十餘巢盤亘三百餘里彼  
此犄角結聚憑險稔惡流劫郡縣鄉村自國  
初以來屢征不服至天順年間該都御史韓雍  
統兵二十餘萬來平兩廣然後破其巢穴兵燹  
未久各賊復攻陷潯州據城大亂後復合兵攻  
勦兼行招撫然後退遵巢穴自是而後官府曲  
加撫處或時暫有數月之安而稍不如意輒復

猖獗殺掠愈毒蓋其祖父以來狼戾相承兇惡成性不可改化近年以來官府招撫之計益窮各賊殘毒之害日甚蓋已至於不可支持矣至於八寨諸賊尤爲兇悍猛惡利鏢毒弩莫當其鋒且其寨壁天險進兵無路自國初韓都督嘗以數萬之衆圍困其地亦不能破竟從招撫其後屢次合勦一無所獲反多撓喪惟成化年間土官岑瑛素能懾服諸徭嘗合各州狼兵一入其巢穴斬獲二百餘功已而賊勢大湧力不

能支當遂退兵亦以招安而罷自是而後莫可  
誰何流劫遠近歲無虛月民遭荼毒冤苦無所  
控籲自思田多事兩地之賊相連煽動將有不  
可明言之變千里之間方爾洶洶朝夕今幸

朝廷威德宣揚軍門方略密授因湖廣之回兵  
而利導其順便之勢作思田之新附而善用其  
報効之機翕若雷霆疾如風雨事舉而遠近不  
知有兵興之役敵破而士卒莫測其舉動之端  
兩地進兵各不滿八千之衆而三月報績共已

踰三千之功，蓋其勞費未及大征十之一，而其  
雖是實事亦太誇張  
斬獲加於大征三之二，遠近室家相慶，道路懽  
騰，皆以爲數十年來未見有斯舉也。職等承乏  
任使，雖衝冒炎毒，攀援險阻，不敢不竭力效命，  
但僅奉方略，安能仰贊一籌，照得宣慰彭明輔、  
彭九霄、官男彭宗舜扶病冒暑，督兵勦賊，顛頓  
厓谷，仆而益奮，遂能掃蕩窠穴，殄滅渠黨，卽其  
忠義激發，誠亦人所難能。其思田報効頭目盧  
蘇王受等感激再生之恩，共竭効死之報，自

備資糧爭先首敵遂破賊險搗自昔不到之巢  
斬自來難敵之寇蓋有仰攻險寨墮厓而碎首  
者猶曰我死不憾亦有仰受賊弩掛樹而裂肢  
者猶曰我死甘心如見民間傳誦以爲盧蘇王受昔  
未招撫唯恐其爲地方之患今旣招撫乃復爲  
地方除患嘖嘖稱嘆謂其竭忠報德之誠雖子  
弟之於父兄亦不能是過矣及照督兵督哨防  
截給餉等項凡有事於軍前各官雖其職有崇  
卑功有大小然皆衝冒矢石炎瘴備歷險阻艱

難比之往年大征合圍困守待成功其爲利  
害勞逸相去倍蓰均乞錄奏以勸將來等因到  
臣照得先該各官呈稱前項各巢各賊積年窮  
兇稔惡千百里內被其慘毒萬姓冤苦朝不保  
夕乞要乘此軍威急救一方塗炭等因其時臣  
方駐劄南寧目觀其害誠不忍坐視斯民之苦  
一至此極及查兵部屢次咨來題奉 欽依事  
理要將前項各賊卽行發兵計勦以除民患正  
亦臣等職所當盡之責但慮賊衆勢大連絡千



里可以計破、難以力攻。欲俟再行奏請。命下、然後舉行。必致形迹彰聞。雖用十萬之師。圖以歲年。亦未可克。故遂仰遵奉勅諭。但有賊盜生發。當撫則撫。可勦則勦。及便宜行事。事理一面密切相機行事。及密行總鎮太監張賜知會。隨該鎮守兩廣豐城侯李旻亦相繼到任。又經轉行知會外。今據各呈前因。該臣會同總鎮太監張賜、總兵李旻及鎮巡三司等官。看得八寨斷藤牛場六寺磨刀古陶白竹羅鳳龍尾仙臺

花相等賊巢穴、連絡盤據、千百餘里、兇悍驍猛、  
酷虐萬姓、流毒一方、自來征勦、所不能克、果已  
貫盈罪極、神怒人怨、委有如各官所呈者、是誠  
兩廣盜賊之淵藪、根抵此而不去、兩廣盜賊終  
未有衰息之漸也、乃今於三月之內、止因湖廣  
便道之歸師、及用思田報効之新附、兩地進兵、  
不滿八千、而斬獲三千有奇、巢穴掃蕩、一洗萬  
民之冤、以除百年之患、此豈臣等知謀才略之  
所能及、是皆 皇上除患救民之誠心、默贊於

天地鬼神而神武不殺之威任人不疑之斷震  
懾遠邇感動上下且廟廊諸臣咸能推誠舉任  
公同協贊唯國是謀與人爲善故臣等得以  
展布四體無復顧慮信其力之所能爲竭其心  
之所可盡動無不宜舉無弗振諸將用命軍士  
効力以克致此雖未足爲可稱之功而朝廷  
之上所以能使臣等獲成是功者實可以爲後  
世行事之法矣不然則兵耗財竭凋弊困苦之  
餘僅僅自守尚恐未克而况敢望此意外之事

哉。照得宣慰彭明輔、彭九霄、官男彭宗舜等，皆衝犯暑毒，身親陷陣，事竣之後，狼狽扶病而歸。生死皆未可必。其官男彭蓋臣者，亦遣家下遠來報効。兩年之間，顛頓道途，疾疫死亡，誠人情所不能堪者。而彭明輔等忠義奮發，畧無悔怠。卽其一念報國之誠，殊有所不可泯者。至於思田報効頭目盧蘇王受等，感激朝廷再生之恩，自備資糧，力辭軍餉，實能舍死破敵，爭先陷陣。唯恐功效不立，無以自白其本心。謂子弟之

於父見亦不過是誠非虛言此皆臣所親見者也及照留撫思田右布政林富已聞都御史之擢而忠義激發猶且不計體面必欲督兵入巢破賊而後出是尤人所難能舊任副總兵張祐叅將張經沈希儀湖廣督兵僉事汪濬廣西督兵僉事吳天挺叅議汪必東副使翁素湖廣督兵都指揮謝珮廣西都指揮高崧及各督哨督押指揮等官馬文瑞王勲唐宏卞琚張縉彭飛張恩周徹宗趙璇林節劉鏜武鑾千戶劉宗本

等督勦縣丞林應驄主簿季本并防截搜捕調  
度給餉等項官員知府程雲鵬蔣山卿同知桂  
鏊史立誠舒栢通判陳志敬徐俊知州林寬李  
東諭召知縣劉喬縣丞杜桐蕭尚賢經歷周奎  
等雖其才猷功績各有大小等級之殊而利害  
勤苦亦有緩急久暫之異然當茲炎毒暑雨之  
中瘴疫薰蒸經冒鋒鏑之場出入崎嶇之地固  
皆同効捍患勤事之績均有百死一生之危者  
也伏望 皇上明招軍旅之政旣行廟堂協贊

舉任之上賞亦錄諸臣分職任事之微勞及將  
宣慰彭明輔等特加陞獎官男彭宗舜彭蓋臣  
免其赴京就彼襲替以旌其報國之義土目盧  
蘇王受等亦曲賜恩典或不待三年而遂錫  
之冠帶以勵其報効之忠如此庶幾功無不賞  
而益興忠義之心賞當其功而自息僥倖之望  
矣臣以懦劣迂踈繆蒙不世之知遇授以軍旅  
重任言無不錄計無不行且又慰以溫旨使  
之不必顧忌臣伏讀感泣自誓此生鞠躬盡死

以報 深恩、今茲之役、本無足言、然亦自幸、苟  
無覆敗、以免戮辱、但恨身嬰危疾、自後任勞、頗  
難、已具本告、回養病乞 賜俯允、俾得全復、餘  
生、尚有圖報之日、臣不勝願望



○○處置八寨斷藤峽以圖永安䟽

照得臣於去歲奉 命勘處思田兩府皆蒙

皇上天地好生之仁悉從寬宥兩府人民今皆  
復業安居化爲無事寧靖之地自此可以永無  
反覆之患而免於防守屯戍之勞矣惟是八寨  
及斷藤峽諸賊積年痼毒生民千百里內塗炭  
已極臣旣目覩其害遂遵奉 勅諭事理乘機  
舉兵征勦仰賴 神武威德幸已翦滅蕩平一  
方倒懸之苦略已爲之一解但將來之患不可

以不預防而事機之會亦不可以輕失臣因督  
兵親歷諸巢見其形勢要害各有宜改立衛所  
開設縣治以斷其脉絡而扼其咽喉者若失今  
不爲則數年之間賊必漸復歸聚生息不過十  
年又有地方之患矣臣以多病之故自度精神  
力量斷已不能了此但已心知其事勢不得不  
然不敢仰負 陛下之託俯貽地方之憂輒已  
遵奉 勅諭便宜事理一面相度舉行不避煩  
瀆之誅開陳上請乞 賜採擇施行實地方之

幸臣等之幸

計開

一移築南丹衛城於八寨臣等看得八寨之賊實爲柳慶諸賊之根柢蓋其東連柳州隴蛤三都嶺三北四等處賊峒以數十北連慶遠忻城東歐莫往八仙等處賊峒亦以數十西連東蘭等州及夷江土者等處賊峒以十數南接思恩及賓州上林縣諸處賊村亦以十數各處賊巢雖多其小者僅百數人大者

不過數百人及千人而止各賊巢穴皆有山谿之阻險阨之守不相通和至期有急或欲有所攻劫糾合會聚然後有一二千之衆多至數千者惟八寨之賊每寨有衆千餘四山環合同據一險無事則分路出劫有警急奔入其巢數千之衆皆不糾而聚不約而同不謀而合故名雖爲八實則一寨此八寨之賊所以勢衆力大而自來攻之有不能克者也各巢之賊皆倚恃八寨爲逋逃主每有緩急

一投八寨卽無所致其窮詰八寨爲之一掃  
則羣賊皆應聲而聚故羣賊之於八寨猶車  
輪之有軸樹木之有本若八寨不除則羣賊  
決無衰息之期也今幸八寨悉已破蕩正宜  
乘此平靖之時據其要害建置衛所以控馭  
羣賊臣等看得周安堡正當八寨之中四方  
賊巢道路之所會議於其地創築一城度可  
以居數千之衆者而移設南丹一衛於其間  
蓋南丹衛舊在南丹州地方爲廣西極邊窮

苦之地非中土之人所可居者故自先年屢  
求內徙今已三遷而至賓州遂爲中土富樂  
之鄉賓州既有守禦千戶一所官軍而又益  
以南丹一衛自遠來徙無片田尺土之籍但  
惟安居坐食取給於賓州州城之內皆職官  
旗舍之居州民反避處於四遠村寨每遇糧  
差徭役然後入城故州官號令不行於城中  
而政事牽沮地方益弊今可一衛之官軍雖  
不滿五百之數蓋盡移其

不則亦不下二

千以二千之衆而屯聚於一城其氣勢亦已漸盛足充守禦遂清理屯田之在八寨者使之屯種又分撥各賊占據之田使各官軍得以爲業以稍省俸給月糧之費彼亦無不樂從且賓州之城旣空又可以還聚居民修復有司之治亦事之兩便者也臣等又看得遷江八所皆土官指揮千百戶等職舊有狼兵數千以分制八寨徭賊之勢後因賊勢日盛各官皆不敢復入反遂與之交通結契及爲

之居停指引分其劫掠之所得共爲地方之害已非一日官府察知其奸欲加懲究則又倚賊爲重不可根極近臣督兵其地悉將各官遵照勅諭事理綁赴軍門議欲斬首示衆以警遠近而各官哀求免死願得殺賊立功自贖然其時賊勢已平遂許其各率土兵入屯八寨就與該衛官軍分工効力助築城垣待城完之日就與城外別築營堡與南丹衛官軍犄角而守亦各分撥賊田使之耕種



以資衣糧。今八所土兵雖已比舊衰耗。然亦尚有四千餘衆。若留其微弱者四所於外。以分屯其所遺之田。而調其強盛者四所於內。合南丹一衛之衆以守。亦且四千有餘。隱然足爲柳慶之間一巨鎮矣。此鎮一立。則各賊之脉絡斷。咽喉絕。自將沮喪震懾。其勢莫敢輕動。稍有反側者。據險出兵而撲之。夕發而旦至。各賊之交。自不能合。如取几上之肉。下筋無弗得者。此真破車輪之軸。而諸輻自解。

伐樹木之本而衆幹自枯、不過十年、柳慶諸賊不必征勦、皆將効順而服化矣、

一、改築思恩府城於荒田、臣等看得思恩舊治原在寨城山內、尚歷高山數十餘里、其後土官岑濬始移出地名橋利、就巖險、壘石爲城而居、四面皆斬出絕壁、府治亦在礮礮之上、芒利礮礮之石、衝射牴觸、如處戈矛、劒戟之中、自岑濬被誅、繼是二十餘年、反者數起、曾不能有一歲之安、人皆以爲風氣所使、雖

未可盡信然頑石之上不生嘉禾而陰堙之  
下必有狐鼠要亦事理之有然者况其地瘴  
霧昏塞薄午始開中土之人來居輒生疾疫  
自春初思田歸附之後臣時卽已經營料理  
其事竟未能有相應之地近因督勦八寨復  
親往相度乃於未至橋利六十里外地名荒  
田者其地四野寬衍皆膏腴之田而後山起  
伏蜿蜒數爲平原环抱涵畜兩水夾繞後山  
而出合流於前屈曲數十里入武緣江水達

於南寧四面山勢重疊盤迴皆軒豁秀麗真  
誰肯可以建立府治臣因信宿其地爲之景定方  
向創設規則諸夷來集莫不踴躍懽喜爭先  
趨事赴工遂令署府事同知桂鏊督令各役  
擇日興工蓋思恩舊治皆在萬山之中水道  
不通故各夷所須魚鹽諸貨類皆遠出展轉  
鬻買往反旬月十不致一常多匱絕舊府旣  
地險氣惡又無所資食故各夷終歲不一至  
府治情益踈離易生嫌隙今府治旣通江水

商貨自集諸夷所須皆仰給於府朝夕絡繹自然日加親附歸向而武緣都里舊嘗割屬思恩者其始多因路險地隔不供糧差今荒田就係武緣止戈鄉一圖二圖之地四望平野坦然大道朝往夕反無復阻隔則該府之官自可因城頭巡檢之制循土俗以順各夷之情又可開圖立里用漢法以治武緣之衆夷夏交和公私兩便則改築思恩府城於荒田者是亦保治安民勢不容已之事

一改鳳化縣治於三里臣等勘得思恩舊有鳳化一縣然無城郭縣治廨宇選來知縣等官多借居民村或寄其家眷於賓州諸處而遷徙無常如流寓者然上司憐其無所依泊則委之管理別印或以公務差遣往來於外以苟歲月故鳳化之在思恩徒寄虛名而實無縣治臣近督勦八寨看得上林縣地名三里者乃在八寨之間其地平廣博衍東西數里外石山周圍如城戶口極高石山之間獨

抽土山一脈起頓起伏分爲兩股環抱而前遂有兩水夾流土山之外當心交合出水之口石山十餘重錯互回盤轉折二三十里極外石山合爲城門水從此出是爲外隘其間多良田茂林村落相望前此居民十餘家皆極饒富後爲寨賊所驅殺占據遂各四散逃亡不敢歸視其土者已二十餘年今各賊旣滅遂空其地不及今創設縣治以據其險或有漏殄之賊潛回其間日漸生息結聚後阻

石門之險前守外隘之塞不過數年又將漸  
爲地方之梗矣故臣以爲宜割上林上下無  
虞鄉三里之地屬之思恩而移設鳳化縣治  
於其內量爲築立城垣廨宇選委才能之官  
興督其役遠近聞之不過三四月而逃亡之  
民將盡來歸各修復其田業供其糧差蔚然  
遂可以成一方之保障且其南通南丹新衛  
五六十里南丹在石門之內鳳化當石門之  
外內外聲勢連合而石門之險亡西至思恩



一百餘里、取道於那學、沿途村寨荒塞日久、  
圉此兩地之人、往來絡繹、而道路益通、又上  
林舊在大鳴山、與八寨各賊之間、勢極孤懸、  
今得鳳化爲之唇齒、氣勢日盛、雖割三里之  
地、以與鳳化、而綠茅綠篠等村寨舊所亡失  
土田、皆將以次歸復、則亦失之於東、而收於  
西矣、及照思恩、雖已設立流官、知府然其所  
屬皆土目巡檢、而舊屬鳳化一縣、亦皆徒寄  
空名、實未嘗有、今割武緣止戈一圖二圖之

地改築思恩府城而又割上林上下無虞三里之地改設鳳化縣治固於思恩亦已稍有資輔但自鳳化三里至於思恩一百六十里中間尚隔上林一縣臣以爲并割上林一縣而通以屬之思恩似於事勢爲便而於體統尤宜何者柳州一府所屬二州十縣賓州蓋柳州所屬者且有上林遷江兩縣今思恩旣設流官知府固亦一府之尊而反不若柳州所屬之一州也其於體統亦有所未稱矣况

賓州自有十五里而又有遷江一縣雖割上林以與思恩其地猶倍於思恩未爲遽損也上林之屬賓州與屬思恩均之爲一屬邑亦未有所加損也然以之屬於思恩則思恩始可以成一府之規模而其間有無相須緩急相援氣勢相倚流官之體統益尊則土俗之歸何益謹郡縣之政化日新則夷民之感發日易固有不可盡言之益也夫立新縣以扼據地險改屬縣以輔成府治是皆所以乂安

地方者也。

一添設流官縣治於思龍照得南寧自宣化縣至於田寧逆流十日之程宣化所屬如思龍十圖等處相去尚有五日六日其間錯以土夷村寨地既隔越而窮鄉小民畏見官府故其糧差多在縣之宿奸老蠹與之包圍因而以一科十小民不勝迫脇徃徃逃入夷寨土夷又從而侵暴之地日凋殘盜賊日起近年以來思龍之屬鄉民屢次奏乞添設縣治

以便糧差蓋亦內迫於縣民之奸外苦於土  
夷之暴不得已而然臣因入撫田寧親歷其  
所民之擁道控告者以千數因停舟其地爲  
之經理相度得村名那久者其地亦寬平深  
厚江水縈迴环匝傍有一江來會亦正於此  
合流沿江居民千餘家竹樹森翳烟火相接  
且向武各州道路皆經由其傍亦爲四通之  
地若於此分割宣化縣思龍一五六七八九  
十十二及西鄉之六八圖共十里之地而設

立一縣治則非獨以便窮鄉小民之糧差賦役亦足以鎮據要害消沮盜賊其間小民村居如那茄馬均三顏那排之類未可悉數皆久已淪入於夷今若縣治一立則此等村寨諸夷自不得而隱占皆將漸次歸復流官而其地遂接比於田寧固可以所設之縣而遂以屬之田寧矣夫南寧一府所屬一州三縣而宣化一縣自有五十二里今雖分割十里之地以與田寧而宣化尚有四十二里一縣

之地猶四倍於一府也。况田寧又繫新創流  
官府治所統皆土目巡檢。今得此一屬縣爲  
之傍輔。又自不同。臣於前割上林以屬思恩  
之議已略言之矣。且左江一帶自蒼梧以達  
南寧皆在流官腹裏之地。自南寧以達於田  
寧。自田寧以通於雲貴交趾。則皆夷村土寨  
稍有疑傳。易成闕隔。今田寧思恩二府既皆  
收設流官。與南寧鼎峙而立。而又得此新創  
一縣以疏附交連於其間。平居無事。商貨流

通厚生利用。一旦或有境外之役，道路所經，皆流官衙門，從門庭中度兵，更無阻隔之患。此亦安民利國之事，勢所當爲者也。仍乞定賜縣名，選官給印，地方幸甚。

一增築守鎮城堡於五屯，照得斷藤峽諸賊既平，守巡各官議調土漢官兵數千於潯州，以防不測。該臣看得各賊既滅，縱有一二漏網，其勢非三四年亦未能復聚。爲今之計，正宜勦撫並行，蓋破滅窮兇各賊者，所以懲惡。



而撫恤向化諸徭者所以勸善今懲惡之餘  
卽宜急爲勸善之政使軍衛有司各官分投  
遍歷向化村寨慰勞而存恤之給以告示賜  
以魚鹽因而爲之選立尊長諭以朝廷所  
以征勦各巢者爲其稔惡也今爾等向化村  
寨自宜安心樂業益堅爲善之志但有反側  
悖亂者卽宜擒送官府自當重賞以酬爾勞  
其漏殄諸賊果能誠心悔惡亦皆許其歸附  
待以良民夫使向化者益勸於爲善而日加

親附則惡黨自孤。賊勢自散。不復能合。縱遣一二終將屈而順服矣。乃今則不然。賊旣被勦而猶屯兵不散。使漏殄之徒得以藉口。搖惑遠近。其向化村分。又畧不加恤。奸惡之民復乘機而驅脇。虐害之。彼見賊已破滅而復聚兵。已心懷驚疑矣。而又外惑於賊黨之扇搖。內激於奸民之驅脇。遂勾結相連而起。此近年以來所以亂始平而變復作。皆迷誤於相沿之弊而不察也。今各賊新破。勢決未敢。

輕出雖屯數千之衆不過困頓坐食徒穢擾  
民居耗竭糧餉而實無益於事吾民久被賊  
苦今始一解其倒懸又復自聚無用之兵以  
重困之此豈計之得者哉惟於各寨之中相  
其要害之地創立一鎮以控制之此則事理  
之所當行亦正宜乘此掃蕩之餘而速圖之  
者其在斷藤牛腸諸處則既切近潯州府衛  
不必更有所設至於四方各寨遍歷其要害  
險阻則惟五屯正當風門佛子諸巢穴而西

通府江北接荔浦各處徭賊最爲緊要之區  
宜設一鎮以控御遠邇而舊已有千戶所統  
率官兵亦幾及一千之數困於差徭日漸躲  
避於附近土目村寨官司失於清理止有五  
百其後上司不聞地方之艱難又於五百之  
中分調哨守於他所而所餘遂不滿二百既  
而賊亂四起守禦缺乏則又取調潮州之兵  
數百以來協守五屯事旣紛亂人無所遵兼  
以統馭非人故地方遂致大壞且其屯堡牆

垣亦甚卑隘不足以壯威設險今宜開拓其地增築高城度可以居二千之衆而設守備衙門於其內取回五百之中分調哨守於他所之兵其自潮州調來協守者則盡數發還原衛以免兩地各兵背離鄉土之苦往復道途之費仍於附近土寨自兵之中清查揀補其原避差役者務足原數一千選委智略忠勇之官一員重任而專責之使之訓練撫摩敷之以威信而懷之以仁恩務在地險旣設

而士心益和自然動無不克而行無不利。參將兵備各官。又不時親至其地。經理而振作之。或案行其村寨。或勸督其農耕。或召其頑梗而曲示訓懲。或進其善良而優加獎賜。或救恤其災患。或聽斷其是非。如農夫之去稂莠而養嘉禾。漸次耕耨而耘鋤之。無事之時。隨意取調附近土官兵款。或百人或七八十人。以協同哨守爲名。使之兩月一更班而絡繹往來於道路。以慣習遠近各巢之耳目。自

後我兵出入自將無所驚疑果有兇梗當事  
舉動然後密調精悍可用土目一二千名如  
尋常哨守然以次潛集城中畜力養銳相機  
而發夫無事而屯數千之兵則一月糧餉費  
踰千金若每一年無屯軍之費用之以築城  
設險犒賞兵士招來遠人亦何事不行何工  
不就此增築城堡以據要害所謂謀成而敵  
自敗城完而寇自解險設而賊自摧威震而  
奸自伏正宜及今爲之而亦事勢之不可已

焉者也



○○○牌行副總兵張祐搜勦餘巢

訪得上林相近地方如淶茅等村皆繫陽招陰  
叛與八寨諸賊裏應外合積年流毒地方卽其  
罪惡尤有甚於八寨諸賊若不勦滅終遺禍根  
爲此今差指揮趙璇齋牌前去督哨副總兵張  
祐處計議仰卽密召領兵頭目盧蘇王受等令  
各挑選精兵一千或一千五百以搜巡八寨爲  
名當日乘夜速發分道夾勦後開各賊村分務  
要殲除黨與蕩平巢穴若是各賊奔竄大名深

山各兵就可留屯其地食其禾米六蓄分兵探賊向往追捕本院先曾發有武緣鄉兵分搜大名諸縣此時各賊正回山下各村躲住及今往勦正合事機仰諭各目務要潛機速發不得遲留隔宿必致透漏消息徒勞無功發兵進勦之後一面差人飛報

計開

綠茅

通親

綠小

批頭

羅煖

其餘各巢不能盡開須要量其罪惡大小可勦則勦可撫則撫相機而行

○○祭永順寶靖土兵文

維湖廣永順寶靖二司之土兵多有物故於南  
寧諸處者嘉靖七年六月十五日乙卯 欽差  
總制四省軍務尚書左都御史新建伯王、委南  
寧府知府蔣山卿等告於 南寧府城隍之神、  
使號召諸物故者之魂魄以牛二羊四豕四祭  
而告之曰嗚呼諸湖丘壯士傷哉爾等皆勤  
國事而來死於茲土山谿阻絕不能一旦歸見  
其父母妻子旅魂飄飄於異域無所依倚嗚呼

傷哉三年之間兩次調發使爾絡繹奔走於道途不獲顧其家室竟死客鄉此我等上官之罪也復何言哉復何言哉古者不得已而後用兵先王不忍一夫不獲其所况忍羣驅無辜之赤子而填之於溝壑且兵之爲患非獨鋒鏑死傷之酷而已也所過之地皆爲荆棘所在之處遂成塗炭民之毒苦傷心慘目可盡言乎邇者思田之役予所以必欲招撫之者非但以思田之人無可勦之罪於義在所當撫亦正不欲無故

而驅爾等於兵刃之下也。而爾等竟又以疾病物故於此。則豈非命耶。嗚呼。傷哉。人孰無死。豈必窮鄉絕域能死人乎。今人不出戶庭。或飲食傷多。或逸欲過節。醫治不痊。亦死矣。今爾等之死。乃因驅馳。國事捍患禦侮而死。蓋得其死所矣。古之人固有願以馬革裹尸。不願死於婦人女子之手者。若爾等之死。真無愧於馬革裹尸之言矣。嗚呼。壯士。爾死何憾乎。今爾等徒侶皆已班師去矣。爾等游魂漂泊。正可隨之西歸。

爾等尚知之乎爾等其收爾游魂歛爾精魄駕風逐霧隨爾徒侶去歸其鄉依爾祖宗之墳墓以棲爾魂享爾妻子之蒸嘗以庇爾後爾等徒侶或有征調之役則爾等尚鼓爾生前義勇之氣以陰助爾徒侶立功報國爲民除患豈不生爲壯烈之夫而沒爲忠義之士也乎予因疾作不能親臨祭所一哭爾等以舒予傷感之懷臨文悽愴涕下沾臆今委知府布告予哀爾等有靈尚知之乎嗚呼傷哉

犒獎儒士岑伯高

照得思田之亂上厯九重命將出師動調四省軍馬錢糧洵洵兩年功未告成而變日不測本院前來勘處是固仰賴皇上好生之仁格於天地至誠動物不疾而速是以宣布威德而旬月之間諸夷卽爾革心向化翕然來歸然而奔走服役固有效勞於下者其間乃有深謀秘計之士潛開默導以會合事機其功隱而難見此惟主將知之功成行賞是所謂首功者也

照得儒士岑伯高素行端介立心忠直積學待  
時安貧養母一毫無所苟取而人皆服其廉一  
言不敢輕發而人皆服其信遊學橫州南寧之  
間遠近士夫及各處土官土夷莫不聞風向慕  
仰其高節本院撫臨之初卽用此生使之深入  
諸夷仰布朝廷之德下宣本院之誠是以諸  
夷孚信之速至於如此本生實與有力焉當時  
平復奏內卽欲具列本生之功而事變方息深  
謀秘計未欲張布於諸夷且本生志在科第發



身不肯異途苟進、堅辭力請、本院不欲重違雅志、遂爾未及奏列、今思田旣已大定、凡有微勞、於茲役者、莫不開列、而本生之功、泯然未表、其於報功勵忠之典、誠有未當、仰抄案回司、卽於軍餉銀內、動支一百兩、及置買彩幣羊酒禮送本生、以見本院慰賞犒勞之意、仍仰遵本院欽奉勅諭便宜事理、給與軍功冠帶、以榮其身、該司仍備給劄付執照、并行原籍官司、以禮優待、免其雜泛差徭、明朝廷賞功之典、彰軍門

激勵之道既以遂其養母之願且以遂其高尚之心是後本生志求科第其冠帶自不相妨仍行兩廣總鎮總兵鎮巡等衙門知會